

ハ 6  
190  
8




經書

卷十五之卷十七  
聖訓中  
陰騭文句類  
聖訓下

四  
不  
晴  
一

八和6  
190  
8

門八  
190  
卷 8



文帝全書內函卷十五

仁和關 槐柱生增輯

聖訓中

清河內傳

余本吳會間人。生於周初。後七十三化。為士大夫。未嘗  
酷民虐吏。性烈而行察。同秋霜白日之不可犯。後西晉  
末。降生於越之西。嶠之南。兩郡之間。是時丁未年二月  
三日誕生。祥光囂戶。黃雲迷野。居處地俯近海。里人謂  
清河叟曰。君今六十而獲貴嗣。童稚時不喜嬉戲。每慕

山澤往往語言若有隱顯。晝誦羣書。夜避衆子。自笑自樂。身體光射。居民祈禱。則余嗤而笑。長嘯曰。土木而能衣人之衣。食人之食。享之而有應。謗之而有禍。我爲人而焉無靈乎。自後夜夢。或爲龍。或爲王者。天符。或爲水府曹。自怪而不甚信。爲吉兆。後三農慙音愆旱。嘉禾無甦。舞雩祝神。恬然無驗。余思曰。寢中夢治水府。今夕當驗。夜往水際。以夢中官銜牒河伯。而驚魂尤恐。怵怩不能定。忽爾之間。陰雲四合。風飛雷震。一吏稽首余前曰。運判徒居。余曰。非我也。我乃張戶老之子。名亞。緣水府得達。故字霧

夫。吏曰。奉命促子。余曰。家人如何。吏曰。先到治所。余惶懼未決。吏揖上一白驢而去。俛首里閤。風雨聲中。頓失鄉地。到一山。連劍嶺而撐音瞳參宮。若鳳凰之偃。下有泮湫。引余入一巨穴。門有數石筍。吏曰。民之禱雨。祝此石而有應。名曰雷柱。吾方褰衣入穴。吏又曰。君記周室有人七十三化。陰德傳家而迄。今否。余方大悟。若夢覺也。吏曰。君在天譜。得神仙之品。於人世鮮有知之者。晉不日有中興之兆。君可尋方而顯化。余曰。謝天使響報也。入穴則若墮千仞之壑。近地而足不涉。若騰身虛空。有

王者之宮中有禁衛。余入。遂見家人悉都其間。改日作  
儒士往咸陽講姚萇之故事。清河傳焚香切記。按字  
霧夫

句及此處  
疑有錯落

答萬真君進祿嗣秘訣表

子以蘊才積德。中叨天祿。與奪之柄。將有子歸。何過謙  
耶。元綱之機。擇善而泄。不可太泛。當囑授事者緘三金  
口也。速命建功。執節大將軍。往察授教者之祖功宗德。  
以為定進。監生衛靈大將軍。發冊編誠。以為給嗣。書可  
壽世子其諒焉。

諭彭定求結放生社

物物貪生。秉心維忍。冤冤相報。造劫無窮。屠腸剖腹。其  
罪伊何。遇寇遭兵。斯哀也已。今人殺機愈熟。吳會殺孽  
彌增。咨爾定求。襄茲善會。仰體好生大德。深符救劫悲  
心。益懋乃功。用嘉爾績。欽哉。

批請演女經丹旨表

惟陰陽分判。而有男女之別。闔闢翕受。而定乾坤之功。  
秉彝攸好。同賦氣以成形。倫紀肇端。首化源於匹配。天  
地既無孤行之道。人物寧有獨生之機。是以義文演卦。

文帝全書 卷十五 三  
妙六子之玄微。周室開基。不二南之雅化。聖教固不遺。閨範真修端。有藉坤元。迺降本而亦分流。遂假邪而正益僞飾。貞潔之心漸淪。松柏之操僅見。大義猶迷。立功奚識。雖三教示覺世之言。然千古少專家之論。提撕警惕。實予之慈。宣布敷揚。維子之任。據奏請演女經丹旨。情辭肫切。同此救度婆衷。原委周詳。本於誠求赤隱。開婦道之津梁。數已符契。啟女蒙之性學。時可敷施。當卽轉咨。旋經會議。侍書種妙緣於前世。假斯警化凡流。左司植仙骨於夙生。賴以闡揚大化。任茲鉅典。贊我天

工。勅元君擇吉以談經。命羣真隨時以行化。言取誠實。醒天下闔閣之迷。文必精純。垂後世母儀之則。果二十四章之美備。自百千萬劫以超昇。特勅行知。欽承勿忽。

太上感應篇序

惟天下之大聖。有以維風易俗。著爲成書。四書五經。惟士子習之。至於盲瞽之愚民。則不能上口。烏能動其心乎。粵稽古訓。乃有常經。此太上之所由作也。其間判善惡之毫釐。欽鬼神於屋漏。上而推之。希聖希天。下而守之。亦不失爲善人君子。嗚呼。惟我上帝。眷顧下民。日求

之於形聲之外。乃反不積功立行。以答雨暘寒燠之恩。以報食毛踐土之德乎。是書勸懇懇。昭布日月。日用常行之際。試於平旦之時。思是書所列。有不汗下沾裳。羞慙無地者乎。有不歎人難對神者乎。有不懽欣鼓舞自快者乎。有不反躬無過。可以對神者乎。子美詩曰。文章千古事。得失寸心知。予亦曰。文章千古事。善惡寸心知。間取尼父之書訓誥之。若昧昧不知。安望有獲。是之謂揠苗助長。立見其槁矣。王子將此書集衆美而大成。將以訓夫天下也。然予憂天下聰明才智之經生。反甚

於愚昏之細民。愚夫愚婦。聞果報之說。則驚心動魄。變而易者有人。至於讀書談道之士。反守其固陋之習。以鬼神爲虛誣。以報應爲恍惚。以人倫日習之常經。爲不足異。以戕賊物命爲不必戒。以上帝神祇爲萬里之隔。以柱聖西天爲三教之異。若此者。其心已牢固不可拔。奈之何。然此書皆言理之言。諒有同好。董生曰。正其誼。不謀其利。明其道。不計其功。旨哉。斯言有味乎。其與此書相合。予勸天下之士大夫。以身傳子。子傳孫。承承不絕。非惟求福田利益久之。亦在其中矣。請覽是書者。皆

作雞鳴。平旦時想正好下手做工夫也。

太上感應篇後序

吾一十七世爲士大夫。未嘗虐民酷吏。周人之急。濟人之乏。容人之過。憫人之孤。一心如此。聽命於天。故能久證真位。今勸世人每日侵晨。持念玉皇大天尊。玄穹高上帝。尋聲赴感。太乙救苦天尊。九天應元雷聲普化天尊。玉虛師相。玄天上帝。金闕化身天尊。四位聖號。誦太上感應篇一遍。以消罪愆。遵以修行。庶持念聖號靈篇。得以感應自然。福祿無量。子孫榮昌。金寶入門。仕宦卿

相。各宜書寫此經一帙。日夕瞻視。依此修行。禮念玉皇聖號。行之二年。萬罪消滅。行之四年。百福皆集。行之七年。子孫賢明。榮登科第。行之十年。壽命延長。行之十五年。萬事如意。行之二十年。子孫爲卿相。行之三十年。注名仙籍。行之五十年。天神恭敬。名列仙班。胡不勉而行之。

玉皇本行集經序

西王母不常降。玉皇經果不容授受乎。何仙姑不出世。玉皇經果不容參正乎。天上人間。書不一也。而參正之。



發揮之。其人又不可得而一人間之文。如詩。如書。如周易。如春秋。不過得世之大儒。足以刪定繫作。蓋其文特經世之文。鋪張可見。故聖人獨任其責。刪之定之。繫之作之。不能以自疑。而成書之後。天下亦不得以致其疑。有如高上玉皇本行集經者。實天上之文。蘊奧難詳。自非天上之至真。安能測識。而正其流傳之誤哉。愚知夫子。雖秉刪定繫作之筆。使居今之世。亦必不肯輕措其手。非不能也。蓋天人殊途而已。先自疑。天下亦必致其疑也。天樞上相張公子房。向遊人間。挾圯上一編。爲帝

者師。自其從赤松子遊。頤神澹泊。與愚共相玉清。每謂玉皇本行集經。流傳下世。彌劫歷年。茲已久矣。其間舛駁訛謬。已不爲少。欲叅而證諸。恐失之僭。一日武信蓬邑真。壇生傅德普。洎邑士趙燦者。遠有是請於三天。玉旨溫然。特畀子房。以叅校此經之任。子房一再表辭。既不逃睿語之丁寧。繼亦蒙玉皇之俞允。猗歟休哉。爲子房者。其被聖眷。爲不薄。而上天下地。凡有見聞。覩茲榮遇者。亦何幸之厚歟。子房釐而正之。不徒黜訛黜謬。爲有功。而且於逐章之次。附爲註說。仰足以讚真詮之

文帝全書 卷三十五  
妙俯足以迪信友之迷。斯經一出。信乎披雲霧而覩青天矣。又嘗肅容諦觀。今日所正經文。子房猶懼夫裁益之文。既行而世間念誦之疑轉熾。乃從舊本畧正乖訛。其間不無一二。以俟來者。得非夫子闕文之意乎。茲因喻生覆蓬邑文板。刻梓廣傳。輒從而糾正數字。附於下方。然此經曾奉副帥冲和應善天尊普化天帝降序列於卷首。今烏得而畧之哉。喻生自宰官身而成功德身。則可移書於蓬邑士友。俾復存之。無輕掩其善而專美也。若然。則斯經也。九天副帥序其首。蓬邑諸生致其請。

天樞上相訂其訛。濮陽喻生廣其傳。愚今又從清州和邑。太乙普化壇生楊顯雄。託鸞而紀其盛。繼當附降科儀。而增大之。則千百載而下。此爲全經。將見大易運乾坤。中庸贊化育。與斯經普行於世。造化功用。至是豈可量哉。

呂祖叅同經序

稽自墳典肇興。而經之名。遂燦然於世。蓋古先聖王。舉人倫日用常行之道。著爲訓典。於以覺世牖民。使人日遷善改過。臻於上治。後世因尊之爲經世之典。要云爾。

文苑全書 卷三  
非惟釋道兩門始創有經之名。以顯異而駭俗也。然梵  
帙瓊編。亦皆佛仙啟迪人心。補裨王化。世儒不察。以爲  
與聖道相左。毋惑乎愚俗之輩。隨流逐波。而輕肆譏談  
也。孚佑帝君之演斯典也。合三教以立言。會五典而垂  
訓。輯四子之微言。集百家之緒論。引經據典。博採旁搜。  
辨疑晰義。條貫叅同。其旨顯而深。其詞該而備。發先聖  
未發之祕。闡佛仙未闡之精。固修證之法言。實訓世之  
要典。其所以啟迪人心。補裨王化者。豈淺鮮哉。覽斯典  
者。務宜讀其辭。玩其意。朝諷夕詠。日進於躬行。勿概視

爲梵帙瓊編。與聖賢書相左也。夫十室之邑。必有忠信。  
寰宇之大。豈無解人。世有深種善根。明達穎悟之士。能  
依斯典而力行之。廣爲流佈。務使閭閻之內。家喻戶曉。  
人人有向善之機。則不求福報而福自駢臻。其所以補  
益王化。羽翼聖賢者。正賴斯典維持不少也。奚第仙經  
云乎哉。如以爲太上勅演之靈文。帝君開闡之法要。什  
襲珍藏。終歲不一覽觀。與但習爲誦持。而於倫常日用  
之道。罔克實踐者。豈帝君覺世之慈心也。夫後之覽斯  
典者。亦當有省於予言。

六。微功過格序。

善惡者功過之未形者也。功過者善惡之已見者也。人性有善而無惡。奈何多過而鮮功。皆由一念敬肆之分。而天堂地獄遂判。入乎善則爲賢聖。入乎惡則爲下愚。今天下自命爲絕世聰慧之人者。我視之。皆絕世懵懂之人也。百計欺人。豈知神不可欺。多方瞞世。豈知天不可瞞。所以報應隨之。不及其身。必及其子孫耳。太上有言曰。吉人視善語善行善。一日有三善。三年天必降之福。凶人視惡語惡行惡。一日有三惡。三年天必降之禍。

則善惡之念慮一萌。鬼神早已窺見肺腑。可不懼歟。蕉窗十則。懲勉備焉。陰騭千言。勸戒具焉。皆所以發明感應篇之旨。要亦同條而共貫。吾不忍人之安于下愚。亦甚樂人之勉爲賢聖。思夫檢束身心。防閑性命。積功懲過之法。無過功過格一書。我願當世自好之士。奉行勿替。案頭日置一冊。勿以善小而不爲。勿以惡小而爲之。勿冒功而勤寫。勿文過而停書。發憤有爲。是誠在我行之久久。自幾于有功無過之地。而爲天地間一正人君子。於以慶期頤。膺爵秩。蔭子孫。而長享福澤於無窮也。

我其負汝哉。

紫府飛霞洞記

吾舊生越嶲音隨間。按越嶲爲郡。居天下之西南角。得坤之用。在漢時戶僅十四萬。其俗多營窟版屋而息。如上古穴居野處之世。其地則多土礦巖穴。接黎之邛音窮。昨都雅之靈關道。自唐大斥土宇。包夷荒而郡縣之民不堪命。越嶲遂與中華壤斷土隔。真人幸啟。偃兵息民。執玉斧而劃棄大渡之外。越嶲遂淪。嗚呼。吾將安歸。當以黎雅爲鄉也。黎之邛峽關有靈應洞。乃吾之變化所。

惟古蒙舊屬漢嘉之青衣。其俗醇厚簡古。如周民好善。堯民可封。其地襟帶巖巒。如太華之磅礴。岷峨之嶙峋。吾嘗愛而居焉。近奉帝命。往來全蜀。至則寓之以行化。恨綦莽掩翳。如小有清虛之所。吾必久畱邑下。苟洙父子念此甚久。吾知而直命之。乃忻然於吾殿後。斬荆榛。去茅菅音姦。爲一洞天。費僅二十萬錢。屋穴皆備。吾揭爲紫府飛霞。蓋本班固賦西都。據坤靈之正位。倣太紫之圓方。與王勃記滕王閣。彩徹雲衢。霞鷺齊飛之義。上以示吾不忘故鄉之意。下以期有志於攀鱗者。休哉蒙蔭。

之下。亦有變化之所矣。後之人。有能自勵而期爲汗漫游者乎。然東山舊祠。興自紹興丙寅。逮今年丁卯。始克有洞穴。而洞穴不成於他人。而成於荀洙父子。亦有數也。一日荀洙欲紀年月日。此事非神。其誰宜爲。吾亦爲忻然親書於石。開禧三年六月十八日。

嘗聞言以足志。文以足言。高作也不荒於放意。不惑於取妍。妙染也。予觀神君親筆所紀紫府飛霞洞記。落筆精妙。王羲之十七帖。飄逸近之。而端勁不及。命辭簡遠。李令伯陳情表。深淳近之。而雄蔚不及。君晉

時人。詞翰皆晉時風度。外雖丹青可掬。內實體骨。不。凡。是以天筆所臨。萬象不能逃其形。嗚呼。豈塵凡可得而擬議者耶。弘治十年四月二十六日提督四川學校按察司副使濟南王敕謹跋

孝仙一烝論

人以孝爲庸行。仙爲至品。殊不知天上無無本之仙人。間有不匱之孝。孝者真行也。仙者真人也。行得真行。自然成得真人。舍此並無別道。吾憫世人愚昧。故作孝仙一烝論。以爲學者勸。

論曰。人而求仙。天下事之至難者也。人而盡孝。天下事之至易者也。乃世人多馳情于其至難。而不知究心于其至易。蓋區孝與仙而二之久矣。夫孝者人之質也。質之厚者發越。質之薄者消亡。孝者人之源也。源之深者流行。源之淺者鬱塞。天下不孝之人。未有能盡弟盡忠盡信之操。天下能孝之人。斷未有不弟不忠不信之事。故一孝而五常百行舉矣。所謂至德要道是也。吾謂人欲求道。烹鉛鍊汞。修成不壞之身。亦只全其固有之身。養靜守真。磨成明淨之心。亦只復其固有之心。窮神達

化。造到盡性至命地位。亦只了其固有之性命。問此身何來。則父母之骨血所成也。問此心何生。則父母之神明所寄也。問此性命自何而立基。則父母之精氣所凝結也。人能全而生之。全而歸之。返其本始。遂證元始之真。還其本來。卽證如來之果。孝在是。仙卽在是。故曰孝仙一炁也。是爲論。

### 三教論

天地得道之體。聖賢得道之用。道以陰陽五行。化生天地萬物。人以陰陽五行。造作日用倫常。天地無爲而人

文帝全書 卷十五 三  
爲之人能以天地之無爲爲之。則三才奠而八荒寧矣。吾觀大有國中。三教分爭。九宗橫逆。失其本來之性善。但求末務之便宜。根本不明。枝葉莫辨。崇釋氏者。但言幾卷彌陀。消卻一生罪障。學聖賢者。徒以飲食富貴。可以奉君親。卽尋真之士。只以燒丹煉藥。認作立宗之路。是皆不知根本。妄求枝葉者也。更有學得一棒一喝。便去疑鬼。疑神。不識來時面目。博得腰金衣紫。不思治國齊家。一味堆金積玉。穿着黃冠草履。竟去訪道尋真。拋了高堂父母。此等愚痴。難以悉舉。甚有員頂方袍。六根

未除。做出許多淫殺盜。映雪囊螢。至善不講。博得一味貪嗔癡。尋鉛覓汞。坎離不明。惹得一心愛惡慾。如此衆生。何日出頭。至於輪迴孽種。莫可言狀。可憐三教聖人。說法要不得一箇歸天。衆鬼卒攫拿。時刻有萬千入地。皆因先覺真言。置若罔聞。魯論曰。人能弘道。非道弘人。金剛經云。有能受持四句偈等。廣爲人說。其福勝彼。清淨經曰。雖名得道。實無所得。爲化衆生。名爲得道。信斯言也。千聖相傳。總歸於一。只在日用尋常之內。舍之更無道矣。予爲南宮帝主。掌一切文苑福祿之籍。卽以文



文昌全書 卷五  
昌設教。化度衆生。無分三教。莫論賢愚。道在是人。予卽眷命於是人。要曉得所謂道之根本。卽是孝弟二字。能勉之者。須當戒慎。

一凡上質之士。自然純良。至於不敬天地。敗壞倫常。雖非人心。亦具人形。果能方寸不朽。自然教化所及。只要修行二字。認得明白。鼓舞作新。亦能有成。所謂修行者。修其往日所行也。或不孝於親。則當修其行以事親。或不忠於君。則當修其行以事君。至於貪婪狂妄。奸盜邪淫。皆反其從前所非爲而修之。豈世所謂好善樂施。修

齋念佛之謂哉。

非不欲人好善樂施等事。但恐人止以此爲修行。是遺本而務末矣。故云。

一凡天性敏慧者。不可自恃。本來愚鈍者。不可自棄。孔子之道。傳於樸魯之曾子。釋氏之道。傳於粗蠢之達摩。惜乎孟子盡心養氣之後。不能復繼。至後儒只講得理學文章。六祖米熟未篩之後。斬斷其宗。至愚僧只曉得玩空說法。我今直以性命教人。先在家庭做起。所謂人事盡而天理見。自恃不可。自棄不可。乃是中庸學問。一凡作事。驟然有成。不可驚喜。久而無成。不可厭倦。驚喜之心。卽是厭倦之心。懷此心者。非大用之器也。吾今

比作先覺。若能後覺。亦相去不遠。只爭先後間耳。何有霄壤之隔也。只要不厭不倦。無欲速。無矜持。必能成其大器。

一凡作事。無分彼此。莫論人我。隨地是道。隨處可以見道。所謂道在邇而求諸遠。反身而誠。樂莫大焉。果能皆反求諸己。則人物彼此之見。自然化矣。

一凡作事。當求其可必者。不當求其不可必者。不可必者。富與貴也。可必者。道與德也。富貴在人。苟欲求之。不亦難乎。道德在己。苟欲取之。不亦易乎。舍易而圖難。知

者勿爲也。吾爲世人說破。此卽是修其天爵。而人爵從之之說。旣得人爵。而棄其天爵。尙然不可。况天爵之不覩。不聞。而欲求人爵。焉可得乎。

一孝弟最難。凡我弟子。要曉得生身之德。恩如天地。孩提之時。撫我育我。未寒則思我衣。未饑則思我食。果能以父母愛我之心。還事父母。加他一倍至誠。方可云事親之道。未有能事親之人。而不悌弟敬長者也。

一忠信不易。凡我弟子。要曉得君臣之義。如同日月。一味正大光明。得志與民由之。能致君於堯舜。爲神忠身

殉社稷爲真忠。逆鱗犯顏爲奇忠。明知不可。故意果敢。爲名忠。不惜一死爲愚忠。夫忠以信而行。信以忠而辨。非但有官守言職者。當審行之。卽兆民士庶亦宜守其忠信。自然有爲。

一仁義匪輕。凡我弟子。能行忠孝兩端。卽是爲人之本。又當濟以仁義。方能卓然見解。有經權常變之分。治亂安危之用。所謂唯仁人能愛人。能惡人。未有仁而遺其親者也。未有義而後其君者也。果能以仁義行忠孝。方爲全人。

一道德至重。凡我弟子。旣知根本道理。不離忠孝兩件。當兼之以德。養其體以全其用。所謂德者何。能行之如未行。能及之如弗及也。終日拳拳。常有不自足之心。則德日休而道日弘。自然登峯造極。天人仰望。不待予之南宮符命。三界鬼神。無不敬畏。久之神遊玉京。不求而自至者也。

以上數章。爲上乘弟子說法。久而行之。乃是聖人賢人。卽是真入神人。上品天仙。往來默佑。百神呵護。天地式從。掌陰陽之柄。竊造化之權。故曰人皆可以爲堯舜。不

在文章。何假化筆。南宮之位。虛其左矣。如或未能。當守我戒。

一曰事親戒忤逆。非所論於大端也。卽一言一動。必當曲意承歡。每欲見親有喜容。不可使親有怒色。或不能竭力。亦當自知有愧。我亦不多責也。

一曰事君戒奸僞。非所論於反背也。卽一事一行。不敢以己之私。蔽人之公。當思愛民如子。當其言。安其職。或不能致身。亦當自知有愧。我亦不多責也。

一曰尊師戒褻慢。有一字一言。師終身師。文字師。道德

師。師之義大矣。一生品行。賴師而成。所以與天地君親並重。今世衰道微。但以書云子曰。認作爲師之道。在此。竟將千聖真傳。置之勿問。此等爲師之人。自先取其褻慢。以致日流於下。師不成師。弟不成弟。莫可言狀。予非立宗得道。焉能職掌南宮。要知三教只貴真傳。千聖總是一理。或一字格我之病。或一言使我遷善。則終身戴之不忘。至於性命由之而得。道理由之而明。當尊而敬之。如同天地父母。豈可褻慢哉。

一曰重友戒褻狎。宜擇人而交。勿因小過而遺棄。勿因

言語而爭競。慎始慎終。以取其長。輔我之短。

一曰敬長戒驕矜。或年齒之長。或文字之長。或閱歷之長。或道德之長。所長不同。能敬而畏之。自然取益。若一味驕矜。人其舍我。有何畏哉。

一曰愛下戒酷虐。凡一切下賤僕隸。俱作兒女看待。自然感我恩德。當思報我。即不食其報。亦不失我天地好生之心。我之品行成矣。

一曰交接戒怠惰。我有事於人。則當求之。何用我惰。人

有事於我。又當應之。亦無用我惰。所謂君子戒慎恐懼之心。乃於交接處見之。

以上數章。乃為中乘人說法。信能行此數者。我當即命南宮文仙降其左右。開其茅塞。使之抵於有成。為命世之材。闡于聖之奧。日後位證南宮。所當寶之重之。

### 孝弟說

人合者緣于後起。天合者出于性成。天下有不仕之人。有寡交之人。亦間有不娶之人。而必無無父無母之人。有父母。即有兄弟。則孝弟二字。固人生之所共知。共能者也。蓋愛親從兄之念。發于天良。根于肺腑。無所假借。

文帝全書 卷十五  
無所矯揉。率我本來之性。行去自然中節。此真天倫之樂事也。觀夫老牛舐犢。燕子含哺。秋風舞葉。而猿猴三聲。明月中天。而蝶魂萬里。當其逢時。觸景未始不興念。劬勞愴懷手足。奈何朝夕依依膝下。雁序成行。而反漠焉視之耶。意者因家道之艱難。乃虧甘旨。爲室人之交。謫有戾墳。箠或牽情。婚宦致疎。白髮或分爭財產。遂損連枝。嗟嗟。冒刃衛姑。婦女尙知大義。而矧乎男子。灼艾分痛。帝王猶切同胞。而況在士夫人。非草木。豈獨無良言。及于斯。愧痛交集矣。夫謹身節用。孝之基也。生事死

葬。孝之實也。顯親揚名。孝之成也。敦宗睦族。孝之所流。通濟人利物。孝之所推廣。人苟能盡孝。自能體親心。以及友于。而式好無尤。是故不弟之端。積爲不孝。能孝之士。斷無不弟。君子讀蓼莪之什。常棣之章。未嘗不廢書而三歎也。吾子勉乎哉。

玉皇本行集經跋

真經昭日月。寶誥出圖書。諒哉垂千萬億劫。至理祕書。具在天地間。堅而不朽。豈非天地之玄根乎。三光待之。而益明。國祚賴之。而永鎮。自世道不古。人心澆漓。尊經

流傳於世。傳之者得。以妄其真。讀之者得。以歎其舛。是故愈趨而愈下。真經旨要。得以訛而益訛矣。討論經義。非蓬邑諸善士。不足以究玉經之差殊。非天樞大道君。不得以證尊經之互異。大哉經乎。煥爛於世。昔之差舛者。復覩混然之經也。其如天地立心。爲生民立命。爲萬世開太平之地乎。予前坐玉藥宮。見秦生者。慨然以刊尊經爲請。孜孜不倦。吾甚美而讚之。果未半載而經板成。復叩予爲之跋。其志實可嘉也。倘人人以秦生之心爲心。能誦其經於口。復持其經於心。福庇幽顯。運扶國

祚。將見平步清微。造此玄玄之境。猗歎休哉。予故頓首稽首。敬跋於後。願是經當與天人共之。

廣化一集語錄一則

今人與他講到孝弟忠信。便說是老生常談。這老生常談四字。誤了許多聰明之子。豪傑之士。豈知老生之所談者。乃教人爲聖賢爲仙佛之談也。豈可以其常而忽之。吾以孝起根。至今身證帝位。只完全得一孝字。亦皆孝之所致也。所以處處降鸞。不憚言之諄諄。莫不以此爲第一件事。著有孝經及勸孝諸詩歌。諸生已目覩耳

聞矣。今日降壇復言之者。蓋以諸生知而不知。行而未  
行也。人這身子是父母生的。心中先有一箇孝字來。這  
箇孝字。就是自己活命之根。就是自己爲人之本。就是  
自己的元神。就是上天與我的至寶。就是古今聖賢傳  
我的要訣。人人能盡得這箇孝字。是於初生來一點元  
氣保固。爲聖賢仙佛。參天兩地。皆基於此。爾等試思人  
一能孝。心中和順。未有不弟。不忠。不信者。孝心出於仁  
心。人未有旣仁而無義。無禮。無智者。所以仁統四端。孝  
亦該四德。查爾等孝款。大畧功少過多。其功則不過尋

常具文。心跡中各存一點意思。說異日吾富貴。要如何  
養親。要如何榮親。不知顯揚未有日。而親已不能待矣。  
豈不枉然。古人云。孝子愛日。誠以得一日則孝一日。雖  
三公不肯易也。爾等有父母者。須竭其力。無父母者。亦  
致其思。子路爲親負米百里之外。是竭力之一端也。爾  
等縱貧富不一。總未到百里負米之境。尙自靳其力乎。  
子路親歿之後。已身榮顯。曰。吾曾不若負米時。得以養  
吾親也。故孔聖嘉其生能養。死能思。諸生反要俟榮顯  
時纔盡孝。豈不大謬戾乎。且孝之一字。所該甚廣。古人



云事君不忠非孝。則事長不順。交友不信。夫婦不和。俱非孝可知矣。又云。戰陣無勇非孝。則凡視聽言動不合於禮。俱非孝可知矣。吾教人千百年。曾無一人體貼此語。不得已設筆錄一法。蓋曰爾欲爲才子耶。爾欲爲顯官耶。爾欲爲聖賢耶。爾欲爲仙佛耶。此數者任爾爲之。但能孝則得。不能孝則不得。爾等亦可以恍然悟矣。

觀心齋語錄二則

予自己未之歲。於楚涵三壇。贊演叅同妙典。宣化南黔。考厥由來。皆爾劉體恕仔肩之力。績云偉矣。乃能不替。

初誠編輯孚佑帝君經籍。彙訂成函。付諸剞劂。其功德力誠莫可量。今復以彙集予大洞諸經文籍。比例全書。同行刊布。爲請洵屬篤志向道之人。然予總司文教。濟人利物。自一十七世以迄今茲。未嘗少懈。初非語言文字之學。亦非清虛寂滅之旨。蓋實有取於倫常日用。而以忠孝仁慈。垂萬世不易之準。夫聖王治世。首重明經。炳蔚兩間。煥若日星。昭回雲漢。卽從古聖賢。亦皆實踐躬行。語無綺麗。大忠至孝。全節完倫。俎豆春秋。芳徽竹帛。不假修鍊。證位佛仙。如予衍化源流。悉類乎是。憫茲

末劫。儒風頹敗。士習澆漓。實行罔敦。虛文多誕。人心世道之憂。不僅在墨裏行間已也。爾體恕以三世習。予儒業兼能奉道真誠。根器不凡。靈明白異。今膺民社之寄。當盡忠愛之心。利濟羣生。行諸方便。果能體予一十七世之慈。自可優入於聖賢之域。上不負明王治世祿。精加厚之恩。中不負父母劬勞三世積修之德。闡我文宗。宣予大化。維爾任之。毋忝成命。

又

昨據桂宮諸真會奏筆錄一案。天下奏懇習鍊者不下

萬餘數。雖其傳度各有宗乘。然皆疏章上瀆。乞賜靈通。符使紛紛。不遑接應。其間誠僞。難以攸分。更兼始終。莫可遽信。恐滋紊亂。致敗士風。有失立教本旨。請予勅下諸司。釐定律法。以重大道等情。申奏前來。予以天秩崇隆。位司文運。不惟士子貴賤。隸吾職掌。卽朝廷黜陟。人世榮枯。莫不係吾衡定。筆錄之設。原非開俗子窺竊。覬覦之端。特以助寒牕苦讀之輩。尤須擇忠信孝友之人。始得受此換胎易骨之術。非泛常遊戲之筆墨也。曩以宣布文化。用廣師傳。江左習尚。最稱繁盛。天下相因。所

在皆有。飛章瀆奏。靡有寧息。其間類多食腴被繡之子。冀假此以博科名。兼之輕浮佻達之徒。欲捷道以求文譽。詐疑雜間。終始二心。名爲鍊筆。念勝穿窬。風俗人心。於此一壞。所謂士習存者鮮矣。此法予昔專勅吾門校籙。教主大闡妙化。陳真人糾司其籍。凡有疏奏。皆由伊彙報。彼不誠不敬之人。雖有奏疏。亦僅及彼而止。不達予前。一向因佑啟人文。未加清釐。今據諸真所奏。誠有關士風不淺。特勅桂宮文曹神將。帶領吏兵。遍巡天下。查視筆錄。授等人姓名。竝察其誠僞疑信之心。爲人

立品之事。分晰彙奏。以候考核。明示賞罰。果有立心制行。根本無虧。雪案芸牕。奮勵上進者。列爲優等。不惟賜以慧光。兼可錫之祿秩。次則省身知過。改絃易轍。濯磨自新。苦志善道者。列爲次等。視其悔心果誠。察其後來無二。亦準錫之善慶。量其所行之事。陰隲大小。而予以報。其有從前所云不肖等輩。察其過惡所犯輕重。勅以文魔惡煞。使之喪志亂神。俾顛倒其性靈。以受冥罰。更置文錄糾察司。真將各一。專職其事。嗣後度師傳授筆錄。俱着由校籙陳真人轉奏。不得擅行上瀆。如違吾命。

凡桂宮諸功曹俱不許傳遞。其年未及冠。以及素未通文之子。一槩不許傳授。如有度師私違此旨。傳授幼年無知及匪類等人。一經糾察。真將察奏。斷不輕赦。爾符圖司教。金本存恪。遵此旨。謹凜奉行。毋輕忽干咎。予自諭知滇蜀諸壇一體遵奉可也。

鱸壇語錄十二則

一  
士人讀書。莫先於養氣。氣平而心始虛。心虛而理始入。若夫暴戾自恣。是之謂傲。天下之理。聖賢之言。難入傲

者之耳。雖終身為學。徒滋惑耳。若君子之量。則冲冲然如虛谷之可容。君子之懷。則蕩蕩乎似大海之莫測。此所謂和而不同。矜而不爭者也。堪笑狹小之夫。一事亦足以動其怒。一物亦足以勞其神。夫至物物而勞之事。事而動之。欲其氣之常醇。心之有主。庸可得乎。宜其青者易白。强者易弱。盛者易衰也。爾等於事物云為。惟平其心以觀事。和其氣以處物。事物之來。我應事物。事物既去。我自還我。如此則氣不竭。心不勞。聖賢之言可入。而天下之理得矣。

欲因人而生。人當遏其欲。因心而有欲。則當制其心。夫天下之可欲者。事不一。物不一。雖具欲端。誰教爾欲。欲之則生。不欲則沒。生沒何常。惟人所欲。耳目口鼻具於人。何者能無欲。香聲臭味呈其形。何者不可欲。兩欲相投。合爲人欲。堅不可破。牢不可入。種種罪孽。皆由欲。代代輪迴。何非欲。然終溺於欲而不返。汨於欲而競逐。始圖遂一念之貪。適一時之歡。後必獲萬罪之積。受萬劫之難。雖然。欲之來也難防。當知欲之去也貴速。來

二

去固屬須臾。只要一心勿忽。由勉漸至於安。自入聖賢之域。

三

理卽天之主。天卽理之生。天理若二事。其實乃相因。未付於人時。磅礴宇宙內。流暢自氤氳。旣付於人後。貫徹心窩裏。閑存不可已。此中甚危微。界限差黍米。可憐無知輩。逆倫與亂理。此乃謂違天。教化無可啟。卽屬皈教者。放言與肆行。這也不是理。非理卽欺天。知天卽得理。是在察識時。何者爲天理。必要辨得真。不可差些子。又

文府全書 卷五  
在擴充候。事事皆天理行之。必盡力。不可怠少許。辨之既已真。行之又復力。久久自然純。不須多着力。受之天者全。已與天合一。天人總一源。只要力諸已。

四

天地鬼神呼吸相通。一誠而已。如世之謂人不知而爲者。與畏人知而不爲者。此羞惡之心也。若由此羞惡之心。而推極之。自必慎獨謹微。爾等須知位天地贊化育。皆從慎獨謹微中。做將出來。又何慮乎鬼神不得通靈哉。惟各宜勉求。無愧幽獨可也。

五

爲人全在於存心。君子小人之所以異者。其存心不同耳。心存於禮義。則時時兢惕。事事謹慎。惟恐或忤於父兄。見責於師友。此所以德日修。學日進。而至於上達。若心存於嗜慾。則時時放蕩。事事邪僻。惟求遠父兄師友之見聞。此所以行愈敗。名愈喪。而入於下流。到此時雖聖賢亦無奈之何矣。善教弟子者。惟於幼年時。時加稽察。一言一行。雖微必懲。則外無所引。內有所懼。庶幾邪念不侈。而可以責之爲善。孟子教人求放心。亦不過要

人常將此心存於理義中耳。非寂守此心而謂之存心也。

六

大哉道乎。非聖人莫能全其體。殫其用。子欲全體殫用。是以聖人爲可學而至也。吾得不爲之訓哉。但自古教無躡等。爾今初入吾門。吾不過取其淺顯易見者言之。以爲爾進步之階耳。凡於日用之常。飲食之際。克勤克儉。以持家。能恭能敬。以接物。自無浮華欺妄之念。擾我天良矣。更能持己端方。事親愛敬。教子以正。處友以忠。

事上以敬。待下以惠。言不妄發。行不亂舉。不道人短。不炫己長。揚人之善。隱人之惡。如此之類。卽是志道工夫。若必窮全體殫用之道。則不獨汝不能明之。卽吾亦遽難與汝言之也。爾當由淺以入深。自近以達遠。自有能明能得之日。惟毋始勤而終怠。進銳而退速。則可矣。

七

道不遠人。人皆具道。非渺非冥。惟勤可造。夫子之道。忠恕而已。堯舜之道。孝弟而已。忠恕孝弟。豈遠人哉。然必由學而入。爾等於學。雖各少明其理。而毫末見諸躬行。

文帝全書 卷十五  
吾不知子等之貴於學者何爲乎。且也相沿習成傲慢。遇諸言躬行者。日作老頭陀。辯理欲者。指爲迂學究。以致間有一二志士。雖欲進修。亦無從借資啟迪矣。吾故有此筆錄一法。教其掃除妄念。一心靜定。但動於心。卽書於紙。不得叅雜。毋生疑貳。隨心信筆。或示戒守。或指功過。無不詳明。以期實行。共入聖道已耳。爾等何不諒吾不得已之心。而區區以文藝見求。殊不知文藝一事。原非吾筆錄專務。亦非吾垂教本旨。吾之垂教。因見學者。徒事浮文。不敦實行。故甘作迂學究。而苦苦相爲勸。

勉雖類老頭陀而不惜也。豈爲爾等艱於誦讀。而施此代倩之術。以資爾等之傲惰耶。然果能志篤行修。而誠明之驗。又何事而不能。况於詩文乎。若徒以工文而求習吾筆錄。是無志於篤行者。其獲罪於吾也甚矣。安得冀吾之應耶。今特詳爲申明。願爾等勿以日久無報而退志。毋以身事煩雜而怠功。必刻刻操存。以期日新。事事檢察。而求寡悔。固其勿正之心。泯諸欲速之念。業業兢兢。慎幽獨於衾影。孳孳急急。惜光陰之草露。勤而益勤。勉之又勉。則道自親。而聖域可冀。庶不負吾此一番。



文海全書 卷十五  
提撕之苦衷也。吾言在茲。鬼神是鑒。勤怠難欺。毋仍舊貫。

八

聖賢立訓。首貴敦本。文藝其末。功名富貴。則未之聞。如歷古來有多少貧賤愚蠢之人。全無筆墨。竝少功名。他却能忠能孝。能弟能信。口無妄誕之言。心無奸險之念。謾說賢人君子。個個讚揚。卽天地鬼神。無不欽敬。及死後爲神爲仙。成佛成聖者。已昭昭在人耳目矣。這是未假先生教訓。不借朋友戒懲的。何今師友日益。文學日

宏如此輩人。卒鮮一邁。興言及此。可勝悼哉。至若爾等。雖具善根。而多迷。卽有善念。而旋失。日漸一日。將至枯亡。竝幾希。亦見泯沒。如何可以不時時警惕。刻刻操存。誓忠誓孝。誓弟誓信。專以用恆久功夫。靜以思生平過孽。久之又久。純之又純。勉強漸忘。自然可望。卽不善於詩文。全無名位。抑何害焉。然能如此用功。自必一旦心地豁然。筆陣風雲。龍蛇變化。而朵朵蓮花。現於筆端矣。天必垂憐。貧者自富。賤者自貴。又何名位不可得乎。聖訓無虛。吾心恆鑒。各宜欽遵。以邀天眷。詩曰。一片婆心。

盡在茲。實爲爾等上天榜。能將此語刊傳世。功德無邊。與我齊。

九

士人爲學。必以倫紀爲根本。次則方言讀書。蓋以書中之言。皆古聖先賢敦倫之法耳。若讀書而不知盡倫。則已獲罪於聖賢。讀之又何益哉。近見世之子弟。多以佻達自矜。不惟不知敦倫。且素無伏案之功。動起登科之想。吾不知伊所自修者何事。而欲廷獻者何能。興言及此。能不哀哉。故吾降鸞以爲警覺。惟願諸子共諒吾心。

而各體焉。以期有成可也。幸無效世之動云家貧不能養親。不能讀書者。請試思之。貧者不過無美衣食以奉養。諸事不能隨時以如親心耳。至於語言氣象。溫清禮儀。豈有貧富之別乎。何對妻子而情無不周。對父母而時若遺忘。可見總無敬親之心。反有家貧之誣。欺天欺人。罪孰甚焉。至云家貧不能讀書。不思一日之間。力作而外。豈無安閒時刻。總是怠惰。交過於貧。究之於心。能無愧乎。如作學生者。父母命其從師。讀書是其日課。一刻偷閒。則失父母期望之心。卽爲不孝。而爲之師範者。

既以教讀爲業。自當盡心以訓生徒。庶無負於聖賢之傳。亦免貽乎尸素之誚。溫故知新。豈無所益。若謂教學卽無暇讀書。則必併教學亦未盡力矣。爾等自今以後。各宜猛省時惕。倘仍舊諉過家貧。致負師傳。有違吾訓。慢親者雷霆震怒。怠惰者鬼神降責。吾亦不能爲爾等寬。而爾等亦自悔之莫及矣。慎之。

十

世上有三種迷人。所怕者只是一種。有暫迷之人。有久迷之人。有執迷之人。不患暫迷。只患久迷。不患久迷。只

患執迷。何也。暫迷之人。不見聖人之大道。不聞君子之正言。所以無從而悟也。久迷之人。俗障深固。一言不足以啟其信。一事不足以悟其機。必定任其酣夢之性。行去。直到那行不去處。一旦翻然。思其所行之非。而後返於正道也。執迷之人。他別造一識。別據一理。無下人虛己之懷。無省身克己之功。認己之理爲天下莫過之理。視己之身爲天下莫及之身。執而行之。雖天命不足畏。聖言不足信。鬼神不足敬。直到死而後已。而終不覺焉。今爾等亦不無暫迷。久迷者。吾不忍置之。而不爲之教。

但冀爾等聽之遵之勉之可也。爾暫迷者。惟多看聖賢言語。一一詳細究明。遇事到來。無論大小。卽細思一番。看於其理合乎否乎。若合則又思吾能體乎。未能體乎。如是思之。而事中之理自出。而我從前種種之行。盡知其錯矣。既自知前非。又何難獲其後效耶。若久迷者也。只要將自己所虛過之四十五年來。回想一番。我幾閱春秋。何德之不立歟。何行之不修歟。一思奮然改圖。以孜孜於餘年。皇皇於老景。勉勵修持。猶可爲朝聞道之君子也。至執迷者。雖有聖賢爲之師友。諒無如之何。

矣。吾復如何而爲之教哉。吾復如何而爲之教哉。惟願爾等毋爲執迷之人。則幸矣。

十一

天下有不肯爲善之人。斷無不能爲善之人。有得爲善而不爲善之人。未有欲爲善而不可爲善之人。不然大賢顏子。何以言舜何人也。予何人也。有爲者亦若是。以此思之。卽能奮發。

十二

竹之名則謂君子。豈其有所修持而得之耶。亦因其高

文帝全書 卷之五  
節虛衷而嘆美之也。草木何知。有此雅致。又梅之有花。發於冬。盡以其能耐冰雪。而不爭妍於衆卉。世俱稱之爲高士。豈不貴甚。子等旣欲學道。先明物理。須知吾欲擅名千古。見尊字內。必有可尊之實。可傳之名。名之傳品之尊。但求諸己而已。若卽物求理。因名考實。以悟徹立身之道。因此而高其節。虛其衷。耐其寒。不爭其艷。則無墮落之患矣。

文帝全書內函卷十六

仁和關 槐柱生增輯

聖訓下

勸孝歌

孝爲百行首。詩書不勝錄。富貴與貧賤。俱可追芳躅。若不盡孝道。何以分人畜。我今述俚言。爲汝效忠告。百骸未成人。十月懷母腹。渴飲母之血。饑殮母之肉。兒身將欲生。母身如在獄。父爲母含悲。妻對夫啼哭。惟恐生產時。身爲鬼眷屬。一旦見兒面。母命喜再續。自是慈母心。

日夜勤撫鞠。母臥濕簟席。兒眠乾被褥。兒睡正安穩。母不敢伸縮。兒穢不嫌臭。兒病甘身贖。橫簪與倒冠。不暇思沐浴。兒若能步履。舉足慮顛覆。兒若能飲食。省口資所欲。乳哺經三年。血汗幾百斛。劬勞辛苦盡。年將十五六。氣性漸剛強。行止難拘束。衣食父經營。禮義父教育。專望子成人。延師課誦讀。慧敏恐疲勞。愚怠憂碌碌。有過常掩護。有善先表暴。子出未歸來。倚門繼以燭。兒行十里程。親心千里逐。兒長欲成婚。爲訪閨中淑。媒妁費金錢。釵釧捐布粟。一日媳入門。孝思遂衰薄。父母面如

土。妻子顏如玉。親責反睜眸。妻詈不爲辱。母披舊衣衫。妻着新羅縠。父母或鰥寡。爲兒守孤獨。父慮後母虐。鸞膠不再續。母慮孤兒苦。孀幃忍寂寞。身長不知恩。糕餌先兒屬。健不祝哽饅。病不知伸縮。衣服或單寒。衾枕失溫燠。風燭忽垂危。兄弟分財穀。不思創業難。惟道遺資薄。忘却本與源。不念風與木。蒸嘗亦虛文。宅兆何時卜。人不孝其親。不如禽與畜。慈烏尙反哺。羔羊猶跪足。人不孝其親。不如草與木。孝竹體寒暑。慈枝顧本木。勸爾爲人子。經書勤誦讀。王祥臥寒冰。孟宗哭枯竹。蔡順拾

文帝全書 卷十六  
桑黠賊爲奉母粟。楊香拯父危。虎不敢肆毒。伯俞常泣  
杖。仲平身自鬻。郭巨埋生兒。丁蘭悲刻木。如何今世人。  
不效古風俗。何不思此身。形體誰養育。何不思此身。德  
性誰式穀。何不思此身。家業誰給足。父母卽天地。罔極  
難報復。親恩說不盡。畧舉粗與俗。聞歌憬然悟。省得悲  
莪蓼。勿以不孝首。枉戴人間屋。勿以不孝身。枉着人間  
服。勿以不孝口。枉食天五穀。天地雖廣大。不容忤逆族。  
及早悔前非。莫待天誅戮。

八反歌

幼兒或詈我。我心覺喜懽。父母嗔怒我。我心反不甘。一  
喜懽。一不甘。待兒待父何心懸。勸君今日逢親怒。也將  
親作幼兒看。  
兒曹出千言。君聽常不厭。父母一開口。便道閒多管。非  
閒管。親掛牽。皓首白頭多諳練。勸君敬奉老人言。莫教  
乳口爭長短。  
幼兒尿糞穢。君心無厭忌。老親涕唾零。反有憎嫌意。六  
尺軀。來何處。父精母血成汝體。勸君敬待老來人。壯時  
爲爾筋骨敝。

看君晨入市買餅又買糕。少聞供父母多說供兒曹。親未饜兒先飽。子心不比親心好。勸君多出糕餅錢。供養白頭光陰少。市間賣藥肆。惟有肥兒丸。未有壯親者。何故兩般看。兒亦病親亦病。醫兒不比醫親症。割股還是親的肉。勸君亟保雙親命。富貴養親易。親常有未安。貧賤養兒難。兒不受饑寒一條心。兩條路。爲兒終不如爲父。勸君養親如養兒。凡事莫推家不富。

養親只二人。常與兄弟爭。養兒雖十人。君皆獨自任。兒飽暖。親常問。父母饑寒不在心。勸君養親須竭力。當初衣食被君侵。

親有十分慈。君不念其恩。兒有一分孝。君就揚其名。待親暗待兒明。誰識高堂養子心。勸君漫信兒曹孝。兒曹樣子在君身。

仁人孝子。天性自然。不待學而能。不待勸而善。所以

生爲聖賢。終作仙佛。

君子曰終。小人曰死。東鄉司命曰。忠臣孝子。今日謝世。明日就

補仙

階。此歌爲世之不孝其親。溺愛其子者作。晨鐘暮



鼓苟有人心。不甘自墮者。當猛然自省。中庸曰。或安而行之。或利而行之。或勉強而行之。及其成功一也。太上曰。其有曾行惡事。後自改悔。久久必獲吉慶。所謂轉禍爲福也。

### 勸世百字

寡慾精神爽。思多血氣衰。少杯不亂性。忍氣免傷財。貴自勤中得。富從儉上培。溫柔終有益。強暴必招災。善處真君子。刁唆是禍胎。暗中莫使箭。乖裏放些猷。養性須修善。欺心休吃齋。官詞莫投入。鄉黨要和諧。安分身無

辱。閒非口不開。是人依此說。災少福星來。

### 真傳品五章

#### 一 性命真傳品

命稟於天。有理有氣。理爲吾性。氣主乎遇。五常百行。行所自具。貴賤壽夭。任其來去。紛華勿喜。修爲自勵。居易俟命。怨尤胡寄。是謂達天。可以格帝。

#### 二 誠意真傳品

人生有意。意乃生音。音發響應。意動心行。天人旣判。邪正攸分。以意蒙意。意失其真。以意遂意。意流於紛。

文帝全書 卷一  
五  
以意制意。意入於冥。以意亂意。意違其情。去欺求慊。道惟一誠。心廣體胖。賢聖可臻。

三正心真傳品

心爲身主。身藏乎心。微而莫測。隱而難明。爲理爲欲。匪人可憑。慎持密密。守正兢兢。喜怒哀樂。勿過勿徇。視聽言動。勿亂勿輕。戒慎恐懼。厥念常存。不慚漏室。無愧明庭。虛靈不昧。洞徹光明。

四修身真傳品

天地儲精。乃生斯人。學聖希賢。厥惟此身。忠孝友悌。

其責綦深。仁義禮智。匪僅其名。以身宏道。肩荷匪輕。卽欲徇私。乃獸乃禽。九思三省。經訓昭明。進德修業。臨深踐冰。

五新民真傳品

天生此民。亶昇惟均。我具明德。民豈有分。知覺旣先。訓迪宜勤。彰明聖道。剖析人倫。匡正直邪。道岸同登。助君宣教。克紹儒明。

省凡寶訓九則

修身。蓬生蔀中。不扶而植。而蘭槐之根。是爲芷。其漸

文帝全書 卷六 六  
之蔭。淑人君子。其儀一兮。質非不美。所漸者深也。  
養心。螾無爪牙之利。筋骨之強。上食垓土。下飲黃泉。  
其心一也。蟹八跪而二螯。無蛇蠅之智。轟然而爲穴。  
其心躁也。故君子役物。小人役于物。  
勸學。青出之藍而青于藍。冰水爲之而寒于水。木從  
繩則直。輮以爲輪。其曲中規。雖有槁曝。不能復挺者。  
輮使之然也。故君子學務博。而日三省乎已。  
勉善。昔者匏巴鼓瑟。而流魚出聽。伯牙操琴。而六馬  
仰秣。故聲雖小而必聞。行雖微而必形。玉韞山而木

潤。川含珠而崖不枯。其必無聞乎。安有不達者乎。  
矻愚。短綆不可以汲深井之水。知不幾者。不可以入  
聖人之言。今大塊假我文章。一之而可再也。有之而  
可久也。通之而可達也。慮之而可安也。反覆察之而  
可好也。以羣則和。以獨則樂。其是之謂歟。  
啓悟。信信信也。疑疑信也。信疑亦信也。言而當智也。  
默而當智也。知默猶知言也。  
榮辱。鱸鮓者。浮陽之魚也。胙于沙而思水。則無及矣。  
挂于欲而思謹。則無逮矣。知己者不尤人。安命者不

怨天尤人者妄。怨天者怠。君子思安慮危。職此之故。人禽山水有氣而無生。草木有生而無知。禽獸有知而無義。人則有氣有生有知有義而並生其間。獨力不如牛走不如馬而恒用牛馬者何也。曰彼能羣此獨不羣也。

大神 南海有竹箭丹砂而中國取之。東海有怪石鉛松而中國採之。北海有皮革羽毛而中國享之。西海有金錫銀鏤而中國寶之。故澤人足于木樵人足于漁農夫不斲削不陶冶而足械器工賈不耕田不鑿

井而足菽粟水火。故虎豹最猛矣而人恒搏而食之。天之所覆地之所載無不盡其制合其宜。夫是之謂大神。

蕉牕十則竝序

感應一篇只三代而下之君子。功過兩條乃三代而上之小人。蓋人根行愈薄。動輒多愆。聖賢不得已而作此書。猶佛老遇下根人說因果也。然世不古處。求其見性明心嗜仁慕義者。指不多屈。有能信行。卽屬殊妙。但塵見未明。肉眼多垢。往往以望報心。搖惑善念。曰某也或

文海全書 卷六  
以善而得貧得賤。某也。或以惡而得富得貴。噫。可甚歎哉。善者得貧賤。焉知不富貴於萬年。惡者得富貴。焉知不貧賤於千古。且善者之先。其孽或不獨貧賤。其僅以貧賤也。未必不因善故。惡者之先。其福或不獨富貴。其僅以富貴也。未必不因惡故。甚至富貴者滿門誅戮。婦子多污。貧賤者一室安諧。彝倫無愧。古云富貴未必是福。貧賤未必是禍。良有以也。惟聖賢菩薩。眼有智珠。胸藏明鏡。見得真。識得透。自不以此動。何物愚夫。妄卽拊心頓地。搔首呼天。自謂小兒造物。神鬼無知。噫。可甚歎。

哉。故欲爲此者。必須開一幅大面孔。辦兩隻大手腳。眼要高。腹要廣。有好生之心。而不作泥土佛。守髮膚之愛。而不做怕死鬼。何妨殺。殺一人。以安千萬人。何妨死。死一身。以顯千萬世。必求忠。必求孝。不可身美其名。而君父得不美之名也。辨是也。辨非。不可身去其謗。而天下有不自之謗。聖人不可毀。有時鄙夷。惠於不道。大人不可褻。有時薄君相。而不爲。打破愁城。跳出苦海。方是大。人明心了性功夫。自不同腐儒計功責效小見也。諸子事吾有年。吾示諸子無數。乃落盡天花。頭有一點。豈以

文府全書 卷六 九  
吾爲戲。直以自己功名性命作戲耳。至香前相謁。首未頓地。爲士者先問名。爲商者先問利。是猶卻步而前人不可得也。今有蕉窗十則。用以共勵。必有一誠實心。恒久心。由勉而入安。自下而達上。不用希功。但祈寡過。不須求福。但祈免災。以是而造於功過盡泯。仍歸太上之天。固爲吾敬。卽不然。望感應有靈。自畏災殃之集。亦受吾憐。倘仍蹈舊時之轍。但同聞霹靂之聲。勉之望之。

一戒淫行

未見不可思。當見不可亂。旣見不可憶。於處女寡婦

尤宜慎。

二戒意惡

勿藏險心。勿動妄念。勿記讎不釋。勿見利而謀。勿見才而嫉。以貌慈心狠者尤宜慎。

三戒口過

勿談閨闈。勿許陰私。勿揚人短。勿設雌黃。勿造歌謠。勿毀聖賢。於尊親死亡者尤宜慎。

四戒曠功

勿早眠晏起。勿舍己耘人。勿爲財奔馳。勿學爲無益。

勿見異思遷。以身在心馳者尤宜慎。

五戒廢字

凡關人身家性命婚姻  
閨闈下筆者並當切戒

勿以舊書裏物糊窗。勿以廢文燒茶拭桌。勿塗抹好書。勿濫寫門壁。勿嚼詩稿。勿擲文尾。於途間穢中尤宜慎。

六敦人倫

父子主恩。君臣主敬。兄弟相愛。朋友有信。夫婦相和。尤當各喻以道。各勉以正。

七淨心地

玩古訓以懲心。坐靜室以收心。寡酒色以清心。去私慾以養心。尤當悟至理以明心。

八立人品

敏事慎言。志高身下。膽大心小。棄邪歸正。思君子之九思。畏聖人之三畏。尤當不恤人言。

九慎交遊

終始不怠。內外如一。貴賤不二。死生不異。尤當功過相規。親近上士。

十廣教化

遇。上。等。人。說。性。理。遇。下。等。人。說。因。果。廣。述。善。行。多。刻。善。書。尤。當。攻。邪。崇。正。以。衛。吾。道。

淨明軒訓士十則

一 盡忠孝

既仕則盡其事。無一刻不守寅恭。未仕則存其心。無一時不懷利濟。敬在養先。敬惟恐其不足。養在生前。養惟恐其不及。體念于微。善承于繼。推愛以愛之。而孝全。

二 慎言行

言必有物。非法不道。善則揚而惡則隱。句句揆度。厥心乃不失口。行必有恒。非禮勿為。正道遵而邪徑辟。事事克慎。爾躬乃不失足。

三 篤學問

學古有訓。書囊無底。博以返約。精義始可入神。勿事涉獵。毋尚粗疎。就有道而問。虚心下氣。考據精詳。得失有鏡。如問途之必已經。儻問非所答。隱而勿斥。

四 廣仁愛

仁施者廣。兼及人物。惻然惕然。如赤子之從井。此心



文帝全書 卷六 三  
常存。天理得而私欲克。愛有所惠。流膏布澤。觸目而  
存。勿事沽名。勿求妄報。體天行澤。常得春和。

五惜物力

物乃天生。爲人所用。用之既竭。物乃盡疲。力由人出。  
人宜共惜。用之太耗。力氣自餒。暴殄天物。古人戒之。

六謹威儀

有威可畏。有儀可象。實爲定命之符。日事傲慢。小人  
近焉。日守虔恭。君子親焉。

七惜字紙

片紙隻字。創自古人。讀古人書。當惜其字。下筆須慎。  
名經勿毀。點畫勿棄。三者戒之。乃爲真惜。

八創義舉

惠及千人。惠及百世。厥爲義舉。創造育嬰。建修普濟。  
其類甚繁。舉不勝舉。因時布置。不遺餘力。

九純心性

心雜則百惡可萌。心純則平旦有氣。性本純一。習而  
生矯。恣意妄爲。皆性所造。心性兩純。念慮正焉。

十敬天神

文帝全書

卷六 聖訓下

三

明明者天。赫赫者神。屋漏無私。神目若電。人生舉措。順逆通塞。皆天所定。順而通。當思仰報。逆而塞。當思克省。何怨何尤。不愧不怍。天神鑒焉。

十戒

一戒不孝。二戒不悌。三戒不忠。四戒不信。五戒不敬。六戒不慈。七戒不廉。八戒不節。九戒不敬。惜字紙。十戒不檢束威儀。

重示十戒

一戒不忠。不孝。不仁。不義。當効力君親。推誠萬物。二戒

不得陰賊殘謀。害物利己。當行陰德。廣濟羣生。三戒不得殺害衆生。以充滋味。當行慈惠。以及昆蟲。四戒不得淫邪。敗正。穢慢神明。堅守貞操。使無觸犯。五戒不得敗人成功。離人骨肉。能以道助物。令九族雍和。六戒不得讒毀賢良。露才揚己。當稱人之美善。不自伐其功能。七戒飲酒過差。食肉違禁。當調和氣性。以輔清虛。八戒不得貪求無厭。積財不散。當行節儉。專恤貧窮。九戒不得交友匪類。居處雜穢。當務勝己。日進高明。十戒不得輕忽言笑。舉動非真。當持重寡詞。以道德爲務。

座右十二則  
淫行不可不戒。天地不可不畏。惡意不可不除。口過不可不遏。人倫不可不敦。立品不可不崇。字紙不可不惜。曠功不可不卻。心欺不可不省。善行不可不廣。孤貧不可不恤。教化不可不宣。

附

羣真語錄

計十二條

白玉蟾真人曰。帝君朝罷。珞璘與仙翁把臂。駐飛鸞開化之勝地。訪玉都素心之洞天。適巡察使暨該城隍。爲

松陵王心睿等重鐫丹桂籍事。同申啟聞。文昌桂香宮主曰。吁。此籍雲間顏氏已刊行世矣。茲心睿等復行付梓。用廣雲間之不逮。有伯玉恥獨爲君子之心。亦當仁不讓者也。事之有功世教。多多益善。用錫壽考。昌厥後裔。宜矣。宜矣。夫末世澆漓。趨末遺本。不思實績。每尙虛文。卽如敬字惜穀之典。莫不家粘戶誦。終未能實實遵行。良可慨也。敬字之本維何。敬行聖賢相傳之善訓。闡演聖賢蘊蓄之精微。當切戒刀筆與訟。顛倒曲直。淫詞艷曲。煽惑人心。甚或攻人陰私。玷人閨闈。害人性命。種

種喪心背理。捉筆落紙字眼是也。惜穀之本維何在。愍農勞苦。賑饑濟困。切戒那移會計。侵漁國賦。及盤算籽音粒。種種詭計苛求。剝削愚民是也。吁。士農爲四民之冠。故文宮每以敬字惜穀爲責任。而宰耕牛有誠。惜字紙有箴。要皆顧本。豈獨貴畜而賤人。重殘紙而輕士類耶。良由天地大生五穀以養民。聖賢廣修文字以教士。不容輕褻故也。世人或撒棄污穢。致干天怒。神殛不宥。是逆天心背聖教。而自取罪戾耳。時當蟾宮洞啟。桂露維新。念爾凡生小子。楊發張芳椿等。奉道有年。秉持能

固恪遵純陽仙翁提命。慮吳江五百年後巨浸。募剏玉都演正樓。誠以五百年後之心爲心。是知本也。爰命司香唐文蔚王守樸侍錄申岳許元勛。各繕寫數幅。及同壇申啟瑞鄒近魯徐天瑞陸玉藻楊暖等。矢志力行。廣爲世勸。俾世之敬字惜穀者。受福無涯。豈小補哉。人或

有言。何妨以飛鸞開化。神道設教對。

松陵王靜若先生諱心睿善士也。是籍於己巳仲夏告成。庚午仲夏。卽遣使乎載紙持金。委印二三百部。敬雖未獲識荆。而盛德音容。一見於翰墨。一形於使

口。醉人千里外矣。博施念切。往返維艱。遂爲叅訂。重梓鐫鏤官板。不一年而工完德滿。青出於藍。辛未中秋。卽蒙諸神彙奏。帝靈降筆。昌後延年。形影相對。感應之速。駭人耳目。如是。我不知世之繼王而廣梓者。其錫福又當何如也。凡爲同志。其共勉之。顏章敬生。愉續識。

劉真人曰。吾自唐季世終。卽蒙帝君拔度。憫念慧根。往性薄植。善緣應運。敷文遭逢。毀譖雖未。力贊皇猷。亦未黨奸蠹國。是以錄置桂宮。初鍊神於紫府。繼授職以列

曹。執籍侍宸。洊歷郎署。今擢晉水部尙書。領桂香都察御史。仙秩崇隆。權衡重要。奉命開導。爾劉允誠。作七言南指。去冬已一示鴻音。然爾習鍊筆錄之法。須識其中祕奧。斷無有間斷可成。亦無有紛雜可就者。自爾以他務一番勤事。便分神氣。加之間斷。遂隔神機。所以近來不進則退矣。雖符圖捷便之傳。原未有不加工七七或百日而可保一得永得者。何況時藝更爲細心密理。必須機暢神流。惟熟則巧生。靜則慧生者乎。簡鍊揣摩。講讀之功。不可廢也。語云。讀書破萬卷。下筆如有神。人皆

知之未能細思之。若讀書不能到破的地位。何能下筆。焉望有神。是知讀書到破的地位。自然有神。卽不鍊筆錄。亦未必不有此境。名哲皆然。况爾亦曾知此祕竅者耶。若云不假人工。全憑神力。制藝一道。可以不下苦讀之功。竟冀萬言倚馬。合式逢時。斷未之有也。何以故。文章者功名之命脈。富貴之階梯。彼蒼假之以司予奪。帝君職此以衡去取。豈易易事。而可以錦心繡口。輕付之荒功廢業。期效速成之子耶。鍊時藝。更不同於鍊詩歌。蓋詩詞歌賦。原非今時專業。有關制科之學。且詩有別

才。亦不拘拘於讀得好詩千百首。不會吟詩。也會吟之。談而神仙瀟灑。更樂得借人發舒。所以易鍊。苟有根器之子。一學便精。誠非所論於時文也。

圓明斗母天尊曰。世人拜斗。拜天上之斗也。拜心上之斗耶。天上之斗。拜猶不拜也。心上之斗。不拜而拜也。何謂心上之斗。一曰孝養父母。二曰尊事君王。三曰敬奉師長。四曰與人爲善。不恃己能。不言人過。五曰立心和柔。無恃性氣。自行訶譴。六曰無聽婦言。蠱惑丈夫。最爲惡毒。七曰無違聖教。詩書禮樂。日用常行。八曰無徇名

文帝全書 卷六  
一  
譽求朋結社。招攬是非。風俗浮夸。人心喪失。皆由此也。  
九日無貪財帛。衣食有限。富厚何益于身也。十日無縱  
奴僕。居官作惡。皆此輩鼠竊狗偷。令我名節掃地也。十  
一日無淫于色慾。好戰者必亡也。十二日毋貪于酒肉。  
穢惡之氣。腐腸喪胃也。十三日無謗毀僧道。三教宗旨。  
何嘗不一。而乃是此非彼也。十四日毋輕求功名。功名  
者上天所以勸人也。十五日毋妄希子嗣。子嗣者上天  
所以報我德也。十六日毋徒延已壽。已壽者父母之所  
從昇也。十七日毋遽信讒言。小人反覆不常。無非離間

也。十八日毋淫人子女。人之子女。猶我之子女也。十九  
日毋輕棄字紙。字紙聖賢之跡也。二十日毋徒溺于本  
生父母。而不思承繼之父母也。二十一日毋取人不義  
之財。財者喪身之本。積怨之階也。二十二日毋惑于吏  
胥。吏胥者喪盡良心之人。無非敗爾公事也。二十三日  
毋往來匪人。匪人奸計百出也。二十四日毋設心謀害。  
心一動。則事未成而報已至矣。二十五日毋諂事鬼神。  
鬼神宜敬而遠之也。二十六日毋禱祀妖邪。妖邪不能  
自保其身。何能爲人禍福也。二十七日者。斗齋之期也。

卽心齋之期也。二十七條者。心齋之事也。卽斗齋之事也。如此方可謂之拜斗母也。如此方可謂之拜南斗六司星君也。如此方可謂之拜北斗解厄星君也。如此方可謂圓明道母天尊也。如此方可謂西天竺國大智光中也。如此方可謂大士尋聲來救苦也。否則拜吾之像呼吾之名。稱吾之號。我方惡之厭之。而何能祐之救之也。吾方恨之笑之。而何能應之通之也。吾可謂世之拜斗者。盡心竭力于此言矣。彭定求號南叻康熙丙辰會狀真拜斗者也。拜時拜不拜時亦拜。天上有斗。心上亦有斗也。吾

故降乩其家。而書此以普勸世之拜斗者也。又曰。拜斗宜拜父母也。拜斗宜拜師長也。拜斗宜拜吾心也。不如此拜斗。而乃日日拜吾像。何爲也。可惜有志學道人。忘卻本來面目。徒作道士伎倆。何爲也。又曰。世人拜斗。不可但爲己延生也。不可但爲己集福也。不可但爲己求嗣也。天人感應。只在爲人不爲己之心耳。吾斗科中。俗本增入許多祈福語氣。俗事俗念。我甚厭聽。天覆地載。日月照臨。非有所私于一人。豈以其諂事我也。而遂加之福乎。可與世人再四言之。爲愚夫愚婦點



破癡迷妄想也。至于三教宗旨。原無二也。原無少異也。原無一間未達也。原無形迹不化也。勿聽世人。販釋謗道。販道謗釋也。

文昌演化清真紫虛元君曰。道生于安靜。德生于卑退。福生于清儉。命生于和暢。患生于多慾。過生于輕慢。禍生于多貪。罪生于不仁。戒眼莫視他非。戒口莫說他短。戒心莫恣貪嗔。戒身莫隨惡伴。無益之言莫妄說。不干己事莫妄爲。默默無限神仙從此得。饒饒饒千災萬禍一時銷。忍忍忍債主冤家從此盡。休休休蓋世功名

不自由。忠君王。孝父母。敬尊長。奉有德。別賢愚。恕無識。時未來兮勿望。事已往兮勿思。物欲來兮勿拒。物既去兮勿追。聰明多暗昧。解算失便宜。損人終自損。倚勢禍相隨。戒之在心。守之在志。爲不節而忘家。因不廉而失位。勸君自守樂貧生。可懼可驚而可畏。上臨之以天鑒。下察之以地祇。明有刑法相繫。暗有鬼神相隨。出處語默。天地皆知。惟正可守。心不可期。日中則昃。月盈則虧。天之道也。樂極則悲。勢極則衰。人之常也。狂風不終朝。驟雨不終日。天地尚如此。何況于人乎。

弘教真人柳棨演廣化真經曰。此乃文昌帝君降鸞諭諸生者也。先是我孚佑帝師命棨曰。世風日下。人心日偷。吾歷塵寰。飛鸞闡化。初有指玄二篇。繼有八品仙經。五品三品真經。又繼有參同妙經。冀以救度末劫。奈世人愈智愈愚。愈巧愈拙。疑者多而信者少。貌從者多而心信者少。先後異操者多。而始終如一者少。將如之何。雖然。不可以難救而不救也。近見井鬼分野。有諸戾氣。盤結幽黯。深屬可憫。顧山明水秀。士生其間。率多穎悟。可與言。汝當于黔地開演玄化。贊吾闡揚。棨稽首再拜。

以弗克勝任辭。帝師曰。汝往欽哉。爰檢校夙因。集諸儒士弟子。宣揚帝師至意。每因事論事。隨問隨答。言遂浩繁。恐義無歸宿。且諸子膠于習見。不達三教同源之旨。頗有援儒入釋道。因釋道而附于儒之疑。於是竭誠叩請。文帝降臨。指示要義。爾時金闕護道王天君。先至淨壇。桂宮諸仙畢集。我聖師同文祖。竝駕五色之雲。白鶴前導。蒼龍捧輿。天花繽紛。瑞靄靉靄。諸生俯伏迎鸞。文祖大書曰。福田常養性中果。心地頻開筆上花。蓋諸生俱素習筆錄者。聞言各能了悟。文祖大悅。諄諄訓此一

篇。我聖師歡喜讚歎。詔棨曰。大哉文言。汝可以知宣化之本矣。當以此義演爲一冊。告諸天下後世。文祖復命曰。汝往欽哉。廼命在會弟子抄錄孝經。力加勘正。且集諸仙佛聖賢勸孝詩文。間有疑惑。請親降臨。再爲訂正。若世有勸孝佳章。並行採入。更使諸子各見所長。或詩或文。附載于後。於戲。聖經賢傳。合先後以同揆。地義天經。統神人于一致。雖若陳言。實爲要理。用廣無疆之帝德。冀回旣喪之人心。

皆屬虛浮。今世俗乖忤之因。悉由積漸而致。始因父母憐惜太過。常順其欲。常佚其身。稍一拂逆。輒生忿怒。甚至親不忍呵叱其子。而子反抵觸其親。以親愛爲尋常。親慈爲應得。又安能推及胎養之勞。撫育之苦。疾病痘疹之憂愁。延師婚嫁之拮据。及至長成。有因分析財產。而怨父母不均者。有聽信妻言。而謗父母不愛者。有放縱驕奢。而憎父母防閑者。有飲酒嫖賭。而憾父母拘束者。有私其妻子。而吝父母衣食者。有厚於親朋。而薄父母用度者。有執定輪養。而致父母饑寒者。有子常出外。

媳不盡禮。而明知父母受氣者。有貿易多年。忘歸定省。而不顧父母奉養者。有父在經營。母勞井臼。而夫妻貪逸。還說父母不是者。有父母患病。不請醫藥。而借言老病難瘳者。夫親之所有。原爲子之後計。及子之所有。反與親市德色。半生創業。弗克自由。一旦強顏仰於子媳。情何以堪。爲子者。方且人前不屑順承。當面搶駁。老拙致親。吞聲忍氣。對客低頭。因此抑鬱膏肓者。亦復不少。更如晚景失偶。心語莫商。感時墮淚。觸景傷情。雪夜霜天。孤衾如鐵。甚或老病沉綿。輾轉床榻。殘燈夜照。顏顏。

七箸時聞哽噎。足僵不暖。髮亂誰梳。穢溺難施。參苓弗繼。鰥父稍可安排。孀母何能遣此。是子所奉親者。惟此時。親所賴子者。亦此際。而人子全無體貼。痛癢不關。抱子者。嬉樂其房。嬖妻者。歡呼其室。好衣美衾。悅妻娛子。使親嗟貧歎老。滿眼淒涼。望一味而不能。丐三餐而忍氣。言之墮淚酸心。誰道暮年有後。豈不思瓦屋簷前。點滴皆依前跡。彼旣薄待其親。安能厚望其子。生前不承有限之歡。死後空灑無情之淚。修齋設祭。戴孝舉哀。不過掩生人之耳目。沽世俗之虛名。况珍饈不及乎黃泉。

華美何施於白骨。親在則視親身爲可有可無之人。親歿則以親骸爲求富求貴之地。終年擇期。柩置空堂。蛛網罏烟。塵封總帳。更有旅邸聞訃。因利羈延。緩不奔喪。需遲年月。甚而兄弟愈多。牽制愈衆。年庚趨避。沙水搜求。或因循淺殯權厝。或停寄蕭寺破廊。及至安葬之後。諸事皆賴地輿。稍或不遂。輒歸咎於地。又想搬改親骸。不思從前如此不孝。根本先傷。上蒼豈肯錫以福利。報以吉地乎。嗟嗟。烏哺羊乳。物類尙具良能。木本水源。人生反昧至性。當思父母愛我如掌上之珠。望我若凶年。

之穀。其間有一種少母苦節撫孤。老父積勞訓子。情景酸淒。尤爲刺骨。吾願天下之爲人子者。親在之日。惜有限光陰。捐隨分囊橐。勉力自盡。孝養及時。若待終天遺憾。風木生悲。始想形容於杳渺。憶笑語於生前。晚矣。晚矣。至親亡後。一切靡文。量力有無。惟棺槨衣衾。不得草草死者。以入土爲安。倘過惑風水。荏苒歲月。其間變態多端。常有播越流離。遂爾宗支莫辨。亦有烟寒戶冷。以致舉葬難期。土主恐失新租。亂填溝壑。僧道欲空屋舍。委棄荒郊。試看今日。暴露之棺。未必不因此而致。爲人

文帝全書 卷六  
子者急宜猛省。桂宮楊用修撰。

此仙跋云。諸生集世人勸孝多篇。惟此詳盡明析。淋漓痛快。查作者係明末儒士楊姓。用修其名。抱才抑鬱。以諸生死靈氣凝結。逍遙山陰古寺之旁。是册告成。文祖降閱。召用修至。大加獎賞。收入桂宮。夫文生於情。當年本至性。以發於文章。豈期以此為證果之地。而文叨識拔。人即擢陞。豐城之劍衝天。汾水之鼎出世。諸生勉旃。為聖賢為仙佛。亦全其至性而已矣。熊上神曰。一部四書。卷卷不離孝字。第人知為學問中

之一事。而不知為學問中之第一事。即知為學問中之第一事。而不知凡學問之事。皆始此一事。皆終此一事。且如論語首章言學。原是孔聖畢世全功。未言所學者何事。次章即揭孝弟為為仁之本。夫學者內聖外王。內何以聖。聖以仁也。外何以王。王以仁也。孔聖學不厭。學此仁也。誨不倦。誨此仁也。顏子好學。始能三月之不違。七十子身通六藝。僅能日月至焉。然則聖賢之學。學此仁。時習習此仁。而孝弟為為仁之本。則亦學此孝弟而已矣。時習此孝弟而已矣。弟亦孝之所推。則亦學此孝

而已矣。時習此孝而已矣。下卷列德行之科。顏子之無所不說而外。惟閔子之事最可紀。此兩論發端之義也。中間問孝數章。雖因人而發。實已統括無遺。若夫親在不遠。遊親年不可不知。竭力之誠。幾諫之敬。喪之必不可短。曾子之啟手啟足。孟莊子之因人因政。詳且盡矣。至其論政。則曰孝慈則忠。是可知致治之不越於孝。而道以德者。道以孝。率以正者。率以孝。先之者亦先以孝也。卽孔聖之言志。亦曰老者安之。是亦廣吾之孝。以爲天下之孝。而其棲棲皇皇。欲與易天下者。皆欲以孝易

之也。由此而推。則論語何曾一句不道箇孝字。大學明德以新民。而至善所在。曰爲人子。止於孝。而孝者所以事君也。則爲臣之止於敬。悉本於孝可知也。上老老而民興孝。則爲君之止於仁。與國人交之止於信。悉本於孝可知也。是明明德者。明其孝之德。而卽以是新民也。中庸天命之謂性。命此孝也。仁者人也。親親爲大。是也。率性之謂道。率此孝也。所求乎子以事父。是也。舜之大孝。武周之達孝。滿乎道之量也。在下位者之順親。以信友。獲上。握其道之要也。中庸歸結於一誠。而誠身以順

親則誠身者。誠此盡孝之身也。由此而推。則學庸何曾一句不道箇孝字。孟子一生本領。祇仁義二字。所以開口便談仁義。其言仁義。則曰未有仁而遺其親者也。仁之實。事親是也。至於仁義之所從來。則性善也。性何以見其善。孩提之童。無不知愛其親也。仁義之所推行。則王道也。王何以爲道。老吾老以及人之老。五十衣帛七十食肉。人人親其親而天下平也。由此而推。則孟子何曾一句不道箇孝字。士子自幼入學館。便明悟一部四書。乃至磨穿鐵硯。坐破青氈。而曾未得其本原之所在。

者。逐章解章。逐句解句。而未能詳說以反約也。吾於四書亦以一言蔽之曰。是亦教之孝弟而已矣。金光神熊國田撰

王天君曰。禍福以善不善爲招。善惡以孝不孝爲極。吾職糾察。最嚴此條。世間不孝之人。恒漏國法。父母強爲隱忍。恐致重刑。旁人不敢聲張。懼遭毒怨。故陽世之獄。若鮮忤兒。而冥府之監。實多逆子。吾每日間。遍歷三界。見純孝者。勝獲奇珍。火輪頓起祥光。雷霆倏駕慈雲。金鞭爲之護衛。見不孝者。視若讎敵。火輪頓起克焰。雷霆



文帝全書 卷二  
三  
倏震惡聲。金鞭爲之怒擊。其有已萌不孝之心。而未著不孝之迹。或偶蹈不孝之事。而未有不孝之心者。縱不遽加天誅。亦必顯然示儆。爲貧苦爲疾病人之所憐。豈知尙爲天之所宥。或水火。或盜賊。人以爲慘禍。豈知天猶以爲薄責。又或借其他罪。以寘之於官刑。判之者判其奸盜之罪。判其邪淫之罪。而不知天實因其不孝而使之罹奸盜之罪。因其不孝而使之罹邪淫之罪。蓋罪至不孝。理無可生。遽誅其身。惡猶未稔。忍音爲借他罪以懲之。欲其知所惕而思改也。故謂吾糾察萬善萬惡也。

可。卽謂吾專糾察孝不孝也。亦可。謂吾鞭打萬惡也。可。卽謂專打不孝也。亦可。

王天君曰。前據金子疏奏元君。懇指示修鍊筆錄之女弟子林瑩。可否承充演經之人等情。已經勅令該處城隍司。核查林瑩生前今世案籍。申奏帝君。茲據奏覆。查得林瑩前三世。本屬有明成化年間。維揚一秀士。姓魏名文熙。立身清潔。未入仕途。因其好逞才辯。每作綺語。譏誹同類。議論先達。且於色戒有傷。故於二世。罰爲女身。置之空門。令受凄苦。彼時乃天啟之中年。受生於吳

崑山縣西村曹氏家也。今已第三世矣。因其矢修清淨。在空門之世。曾潔志焚修。供奉大士。曾晤鍾山定慧女導師。令其習煉立功。參悟太陰煉形之訣。惜未得手。卽經棄世。其與體恕有此一段因緣。實係彼三世前有以種之也。再查今世雖爲女身。年尙少穉。無諸大過。其所。以兩世受女身報者。乃綺語一罪。未經消釋故也。各情案奏覆到來。又據本壇檢點奏報。淳修現在禮斗祈恩。消災懺罪。元君甚悅。已轉懇帝君。賜加化度。俟其禮斗期完。令卽具表申奏。懺罪求恩。元君擇吉降臨。親爲開

示。以候演經。竝奉帝君元君之命。着詢問金本存。旣爲淳修傳度師。可否保其始終不二。着明白奏覆。此段因果。雖屬渺茫。奉帝君旨。特令乩沙明示。以見士人綺語之報。卽兩世女身。尙未消釋。今賴夙生空門之修。得入法會。若得誠虔不二。傳演丹旨。夙垢盡淨。仙緣可結矣。竝諭淳修知之。凜之。

文昌演化三天闡教。鈍齋張真人曰。余聰明懼炫。才智戒矜。惟慕謙恭。篤敦孝友。諸惡務去。衆善奉行。未嘗一意望報。未嘗一事沽名。學勵多年。倦防一息。以致誠通。

帝載。遂忝名列仙曹。勅我三天闡教。命吾陸地行查。適聞禱請。羣集悃誠。文牘屢降。俚語疊批。獨是信者固有其三。而疑者不無其七。作假術以欺人。飾虛文而誑聖。且或坐踞兩傍。笑喧一室。如此褻瀆。能恕鑒乎。蓋聞秀頑不一。先王聿大明倫之模。愚智各分。至聖克宏無類之量。敬陳條例。普著甄陶。粵自滅良肆志。凶煞不少。折摧養性存心。吉神洵多擁護。舉動須循規矩。能圓能方。措辭宜合準繩。罔偏罔曲。毋悖逆君親。毋欺慢師友。毋驕傲族戚。毋侮壓鄉鄰。毋迷戀酒色。毋恃逞氣財。毋吝

貲棄美。毋潑鎗陷良。毋貪謀詐佔。毋瞞昧侵吞。毋違例剝取。毋挾隙撥唆。毋口是心非。而是非顛倒。毋內邪外正。而邪正紊淆。毋嫉妒賢能。而毀謗沮抑。毋交遊比匪。而博奕戲淫。宜排難而解紛。宜急公而尚義。宜敬老而慈幼。宜恤寡而憐孤。居家總當勤儉。處世悉要寬洪。上承祖宗。不外累仁積德。下啟孫子。惟憑說禮敦詩。莫言任騙無填。赫赫陽虧陰補。弗謂受欺鮮報。昭昭人屈天伸。假公道以蔽人窳。受賄之紳衿罪重。徇私情而偏已斷。貪賍之宦宦孽深。富貴貧賤均須素位而行。上下尊

卑統祈安分以處。或金諾。或鼎言。觸處沾天漢之波潤。如燭分。如困指。隨時映斗極之光輝。所以太上篇曰。禍福無門。惟人自召。帝君訓曰。行時時之方便。作種種之陰功。人能如此存心。天必錫之以福。罔云有用之精神。謬聽無稽之冥誕。頭提三尺。臺斗之明鏡難逃。身統四知。昌邑之暮金故卻。崔君孝友。光德鉅推甲門。郭子忠良。親仁盛成國族。王佑並茂三槐。良由種德。禹鈞齊芳。五桂原本培心。放龜免溺。緣釋生而得生。舍鯉延齡。因救命以綿命。給義漿以飲行人。璧生誠可驗。從治命而

全。父妾草結正能徵。楊寶之累公四世。爲酬愛物情深。叔敖之消咎兩頭。擬償利人念切。盡人莫後。士子尤先。大過革小過。睽既期損益咸善。同人需家人履。更冀剝復恒宜。倘果无妄而中孚。自應渙否而萃。泰祀吾位。竭誠致禱。無不共指迷津。遵我箴矢。矢志自維。何難齊登覺岸。故善滿一千三百者。叩請帝君。賜福門庭。善盈三千者。奏聞宸闕。勒名仙籍。亟宜以太上之篇。帝君之訓。並錄座前。遍告宇內。幸無泛泛視之。心淪末路。功墮岐塗。以貽後悔。

文帝全書 卷十七  
杜真官曰。吾今奉帝命批示。總無非要爾等好善去惡。非有私論。百行須自立品。毋自任己能。毋自恃富貴。毋自逞豪強。毋不存公道。毋用險欺。此等之存心。必不能長存爲人也。豈不自悞哉。且時輩多有以感應爲不足信。有以聖訓爲迂儒之談。更有以陰騭爲無憑。爲妄誕欺世。種種口過。雖盡南山之竹。亦不勝載。然無非自折其算耳。何不早爲之省心耶。諸子能省此心。事事無不合節。卽無往而非心安理得。孝弟忠信。亦不外是。有何他術哉。

文帝全書內函卷十七

目錄

李漣序

葉琛序

陰騭文句頌

李匪跋

袁宏道後序

李文珂跋

又

孫鉉跋

陰騭文句頌一卷。藥珠仙吏西安會友肅雲峰乩著。雲間孫日隆同其子鉉輯刻。

文帝全書內函卷十七

陰騭文句頌序

竊自教設瞿曇。以慈悲為本行。法垂柱史。以感應為初心。溯聖皇十六字之心傳。存誠首重。故帝君十七世之證果。陰騭惟嚴。律已者寶是篇為龜鑑。濟人者藉是語為津梁。非吾元皇憫世。曷垂金科玉律之文。斗府頒綸。孰煥東壁西園之彩。况桂宮握管。句著赤文綠字者。曾公倡其元詮。玉局填詞。意在托雅揚風者。仙侶繩其芳躅。莫不諄諄於藥笈琅函。輝煌聖誥。抑復懇懇於蕉牕。

文帝全書

卷十七

李序

二

文帝全書 卷十七  
桂籍扶獎人倫。非第淮南鴻寶。珍作靈文。王充論衡。資  
爲枕祕。至如漣者。絳闕微銜。瑤臺散秩。學翰關尹。五千  
餘言。道德罔聞。才遜奚囊。二十八宿。心胸無有。名畱樞  
府。職玷仙班。自慙樛櫟之材。敢靳秕糠之導。片言弁簡。  
豈同皇甫先生。一冊垂芳。願質蓬萊仙衆。是爲序。康熙  
二十五年歲次丙寅季春藥珠外史天台羽客李漣稽  
首撰。

又

蓋聞木公金母。啟清淨之真詮。陽谷扶桑。授皇庭之祕

笈。故大道固與日而齊光。至理則非人而莫闡。欽惟文  
帝。憫彼顛音民。鸞書輝燦。聿垂陰騭之文。鴻寶尊崇。久  
式訓行之矩。奧旨旣傳。爲模範。微言未極。於贊揚。吾雲  
峰曾公。忠孝名儒。神仙真宰。睹塵氛之黯黩。錫以朝曦。  
嗟弱島之溟滓。俾之慈筏。恭就元皇之訓。綴以揚頌之  
文。句櫛字疏。允矣桂宮之良史。肌分縷析。卓哉玉局之  
功臣。授高座以梓傳。命同人而疏引。愧乏一詞之可贊。  
式昭萬世之不刊。丕扇人風。載銘清德。謹序。時康熙二  
十五年上元丙寅三月中澣麗水葉琛書

文帝全書內函卷十七

古鼎劉廣恕

義陵劉體恕無我彙輯

古渝金本存全訂

古鼎劉悟誠

仁和關 槐柱生校定

陰騭文句頌

帝君曰吾一十七世爲士大夫身

處尊易驕。驕則易墜。驕爲墜基。危哉高位。久處益尊。

不驕所至。帝君之先。貴十七世。



未嘗虐民酷吏

驕則生威。威過則猛。豈忍酷虐。虐與酷並。不驕帝尊。十七世時。凡於吏民。撫之以慈。

救人之難

茫茫浩劫。芸芸衆生。如獸罹網。如魚入罾。啟大慈心。運大慧力。出之水火。置諸衽席。

濟人之急

渴則求飲。饑則求食。顛則求扶。陷則求出。生死剎那。頃刻云何不急。仁術攸濟。種種各給也。

憫人之孤

人之無告。莫如四窮。觸於大慈。憂心有忡。旣憫以心。必憫以政。斯世之孤。不幸之幸。

容人之過

人非聖賢。奚能履中。太過不及。叢愆厥躬。教之誨之。提撕不輟。休休之度。天高海濶。

廣行陰騭

有願而背。無行不著。行願若爾。修真所懼。難殫難極。不睹不聞。舉心動念。利物利人。

上格蒼穹

惟天高遠。視聽則邇。有意感通。非天所與。行善不息。施恩莫知。皇矣上帝。降鑒在茲。

人能如我存心。天必錫汝以福。

翼翼綿綿。惟精惟一。成真之祕。和盤托出。人之多福。匪關青旻。朝乾夕惕。內求諸心。

於是訓於人曰

帝君大慈。痛憫一切。普度羣迷。乃立文字。天何言哉。時或諄諄。飛鸞開化。覺於斯民。

昔于公治獄。大興駟馬之門。

未有顯者。先高閑閔。行善責報。我疑于公。最邀於天。亦信其素。天人既孚。執券以付。

竇氏濟人。高折五枝之桂。

燕山之竇。五鳳同翔。人企其盛。咸推義方。義方惟何。勿驕勿吝。溥其仁慈。靡敢不盡。

救蟻中狀元之選

全此羣蟻。乃獲大魁。不忍一念。通於太微。肖小翹毛羽巽鼻順也。蟻音儒蟲行貌。愛生同性。凡百君子。莫輕微命。

埋蛇享宰相之榮

仁者徧愛。豈忍用殺。除害保民。不敢愛物。孫叔埋蛇。保民念切。未居相位。先見相業。

欲廣福田

疆理攸獲。富貴長年。人什已百。人百已千。推此念也。誰不欲廣。徒憂鮮獲。耘耔在焉。

須憑心地

耘耔幾何。方寸之地。稂音郎。莠音酉。螟音冥。螞音特。滋長最易。去害稼者。靈苗芄芄。蓬音蓬。何種不熟。何年不豐。

行時時之方便

利濟之事。何地蔑有。知而不為。寶山空手。雖小必行。漸進而久。日居月諸。毋怠毋苟。

作種種之陰功

古之至人。非炫其善。近者不覺。高者自見。人能積累。譬如為山。日進一簣。九仞非難。

利物利人

與我同類。與我並育。熙熙擾擾。魚魚鹿鹿。所欲與聚。所惡與去。秉誠以行。庶幾忠恕。

修善修福

善為福基。福為善應。我能黽勉。天即持贈。雞鳴而起。孳孳有為。在我克盡。何求不歸。

正直代天行化

進賢峩峩。其德則風。加草斯偃。益其菁葱。如砥如矢。至誠至公。驅而之善。何令不從。

慈祥為國救民

蚩蚩烝民。不啻赤子。動罹於羅。免亦無恥。獲享飽煖。得明孝慈。父母孔邇。噢之咻之。

忠主孝親

食毛踐土。伊誰之恩。屬毛離裏。伊誰之身。匪忠無君。匪孝無親。忠孝有實。慎求諸心。

敬兄信友

五年以長。事之如兄。讀書尚友。百世可風。况我切偲。况我手足。敬之信之。曷敢不篤。

或奉真朝斗。或拜佛念經

玄元垂典。釋迦立言。皈禮宣誦。滌瑕度先。應若枹音扶鼓。古今灼然。隨其願力。驗於至虔。

報答四恩廣行三教

大哉四恩莫可名報。圖報不能。思報有道。儒之忠恕。釋之慈悲。道之感應。恪遵勿違。

濟急如濟涸。轍之魚救危如救密羅之雀。

水乾網密。飛潛兩窮。哀哀斯人。困於鞠凶。何以異此。可悲可恫。仁者赴援。烏能從容。

矜孤恤寡。敬老憐貧。

存之以仁。行之以義。隨觸則發。匪勉而致。矜之恤之。敬之憐之。天真爛漫。各當其施。

措衣食周道路之饑寒。

壺漿敝袴。音庫為惠幾何。濟夫當阨。少勝於多。長途無

依。單衣枵音器腹。忽得飽煖。白骨重肉。

施棺槨免尸骸之暴露。

澤及枯骨。古人難之。勿吝勿怠。於焉久施。上免鳶鳥。

下免狐貉。原隰之哀。音抔嬉於冥漠。

家富提攜親戚。

睦族同心。所苦力綿。於力既裕。胡為不然。晏子三黨。輕重後先。君子勗哉。當師古賢。

文帝全書 卷一  
歲饑賑濟鄰朋

天災流行。人艱桂玉。天下寒士。皆縈心曲。其臭如蘭。其居比屋。緩急之中。敢靳錢穀。

斗秤須要公平。不可輕出重入。

權量之謹。一王大法。蔑制無王。罪不可活。計其所贏。盈音眇若毫髮。積愆冥冥。定有天罰。

奴僕待之寬恕。豈宜備責苛求。

先民有言。力亦人子。寔命不猶。乃爲爾使。勞苦不恤。鞭撻恣情。反之於躬。寧乎不寧。

印造經文

三教聖人。各立文字。言人人殊。總歸覺世。鑄印廣施。流通無滯。啟瞶開聾。立教之志。

創修寺院

龍宮貝闕。奉佛崇立。祝釐護國。保民祈年。金碧鼎建。頽毀復完。種種饒益。是真福田。

捨藥材以拯疾苦

人生四苦。病魔最酷。奇音矣富人。哀此羸獨。廣市珍藥。謹依良方。隨病以給。登之壽康。

文帝全書

卷十七

陰騭文句頌

七

施茶水以解渴煩

嚴霜酷日。迢迢道途。叶思飲不得。傷如之何。薑湯百

沸。茗音敏汁一壺。解焦煖胃。勝於醍醐。

或買物而放生

大而牛馬。小而螺蛤。音各刀俎在前。孰不求活。有力施

錢。無力施言。曲行不忍。務求生全。

或持齋而戒殺

與物苦惱。供我肥甘。苟一自反。能無惕然。未能斷葷。

漸戒殺業。三寸舌根。最易淪劫。

舉步常看蟲蟻

嚴護威儀。娟音娟飛無損。大德發願。充滿不忍。舉足有

過。造次之間。悞傷微命。殺戒未全。

禁火莫燒山林

堯時火政。驅害救民。功在萬世。魏乎大人。此後復為。

莫大惡業。所傷實多。勿稱益烈。

點夜燈以照人行

月無常朗。人有宵征。街市周折。隴陌溝塍。音成懸燈相

照。儲燭贈行。迢迢昏衢。到處光明。

造河船以濟人渡

茫茫野渡。滾滾烟濤。佩瓠胡互二音義同有葉。架竹無橋。厲

憂其深。卬音昂靡有招。一葦可濟。無羨蘭橈。

勿登山而網禽鳥

深山茂林。嚶嚶鳥鳴。聚族托處。與人無爭。密張爾羅。

悉戕其生。網羅三面。心何逕庭。

勿臨水而毒魚鰕

聖人釣弋。不忍於網。罾網已酷。毒禍更長。鱗介樂國。

變為鳩漿。哀哉游泳。無命不戕。

勿宰耕牛

嗟嗟大武。負重拽犁。力於三農。靡有已時。盡力於壯。

加刃於疲。傷心慘目。是何報施。

勿棄字紙

千聖道脈。二藏法言苟非點畫。何恃以傳。殄則獲

譴。惜者慶綿。何去何從。諸賢勉旃。

勿謀人之財產

物各有主。賦命自天。逆天逞欲。狠貪肆奸。謀未必得。

得未必綿。悖入悖出。當思訓言。



勿妒人之技能

奇才異能。稱者籍籍。勇違於言。懦變於色。賢不思齊。徒抱妒嫉。何損於人。恐遭陰責。

勿淫人之妻女

萬惡之首。戕生之源。出爾反爾。思之膽寒。刀頭餽。蜜。截舌可憐。革囊盛穢。常作是觀。

勿唆人之爭訟

小忿必懲。委曲善勸。火畧添油。開隙構怨。敗家破產。所爭幾何。慎之慎之。宜解勿唆。

勿壞人之名利

熙熙攘攘。總爲利名。顯親立業。幼學壯行。撓其際遇。誤其前程。試以自反。將何爲情。

勿破人之婚姻

朱陳相締。媒妁旣行。父母素願。男女正情。莠言自口。敗於垂成。險心兩舌。厥業匪輕。

勿因私讐使人兄弟不和。勿因小利使人父子不睦。

兄弟同氣。父子天性。豈至相夷。乃有逆行。挾怨挾貪。唆離唆競。破壞大倫。人中梟獍。

勿倚權勢而辱善良。勿恃富豪而欺窮困。

良善易辱。困窮易欺。炎炎赫赫。何所不爲。詔爾子弟。勅爾臧獲。無傷人心。恐干天戮。

善人則親近之。助德行於身心。

年齒莫較。貴賤勿論。道之所在。師之所存。去爾驕志。炙其德馨。天爵日進。人爵自尊。

惡人則遠避之。杜災殃於眉睫。

豺狼當道。其誰欲前。勢位所在。羣蠅附羶。冰山之消。曾不踵旋。非徒遠害。庶幾品全。

常須隱惡揚善

尺有所短。寸有所長。所短思揜。所長欲彰。人同是心。言者審量。忠厚之道。有譽何傷。

不可口是心非

喜則面從。怒則腹誹。直道謂何。城府斯起。由焉不覺。慝何從修。心口如一。忠誠可求。

剪礙道之荆榛。除當途之瓦石。

木石妨行。剪之除之。小勤筋骨。大便驅馳。礙道當途。有甚木石。能剪除者。無量功德。

文帝全書 卷二十一  
修數百年崎嶇之路造千萬人來往之橋

九折興歎。溱洧濡輪。水陸攸阻。行道傷心。羊腸旣夷。虹影聿新。溥哉利澤。千載及人。

垂訓以格人非

出其嘉言。勗以懿行。作固可欽。述亦足敬。上真垂訓。鑄布以傳。頑廉懦立。厥功倍焉。

捐貲以成人美

好事難成。但作嗟咨。夷考其故。苦於無貲。指困與粟。連舟助麥。種種成就。何求不得。

作事須循天理

人之方寸。萬理畢備。事天之功。求其無愧。無愧後行。庶可對天。臨事而懼。衾影晏然。

出言要順人心

未能塞兌。亦思銘金。惟口興戎。毋易爾音。人耳至聰。人心至公。悖出悖入。逆之則凶。

見先哲於羹牆

立教垂訓。猗歟先民。從聞思齊。私淑其身。若登其堂。若贄其門。几席與接。耳提面陳。

慎獨知於衾影

勿謂無見。十日視之。勿謂莫察。十手指之。一念逾矩。指視若斯。隱微無忽。念茲在茲。

諸惡莫作

害苗之莠。毫末必拔。害苗之蟲。肖翹必殺。雖小勿爲。去惡良箴。古人至言。勗哉永遵。

衆善奉行

無鉅無細。利物利人。外努於力。內堅其心。見無不爲。久而益真。格天獲福。非其所論。

永無惡曜。加臨常有吉神擁護。

行善責報。非行善人。行善不報。非上帝心。熒惑退舍。文曲入門。絲忽不爽。朗朗見聞。

近報則在自己

天道無私。福善是依。己作己受。枹騰響隨。埋蛇救蟻。於善似微。得元得相。如取如攜。

遠報則在兒孫

未定之天。疎若有漏。及其既定。不啻瓜豈。駟馬之于。五桂之實。猗歟休哉。克昌厥後。

百福駢臻。千祥雲集。豈不從陰騭中得來者哉。  
後之所受。前之所作。作於隱微。受於顯爍。報施善人。  
無舛無錯。勉而行之。俟諸冥漠。

進頌偈言

帝君憫世。誕垂鴻文。朗人靈臺。出人迷津。引其極玄。  
示以最真。無賢無愚。或卑或尊。晨鐘百撞。頂門一針。  
捧誦再拜。何幸得聞。懽喜獻頌。不知所云。

陰騭文句頌小跋

陰騭文。乃元皇憫世人之溺於惡趣。而不思返。故垂訓  
以拯之。樂善之士。久已梓行於世矣。但贊頌之詞。闕焉  
未備。西安雲峰曾先生。爲之分句闡揚。將元皇拯世婆  
心。疏發殆盡。予披閱之下。知先生能體元皇好生之德。  
竝能將拯世苦心。不惜爲愚蒙一一剖出也。青溪孫子  
雪亭。欲壽之梓。吾知是書一出。非獨好善之士。見之而  
善念益堅。卽素行不飭者。亦將革除念慮。而不敢爲非  
矣。敦龐淳厚之風。又何難復見於今日哉。予故喜而附

書於後。康熙二十六年歲次丁卯三月中澣東陽李匪  
非庵敬跋

又

上帝好生。人性皆善。但賦質不齊。習染不一。其有不待  
覺而自能者。此上哲之士也。至於中材。則必待於有所  
感發矣。若覺之感之而自若者。豈非下愚乎。青溪孫子  
雪亭。樂善好施。出於天性。蓋其世德相承。凡庭訓所習  
聞者。無非善言善行。故偶有所見。必勉力行之。惟恐弗  
逮。西安曾公所著帝君陰騭文。頌言句櫛字比。誠指迷

之寶炬。拯溺之慈航也。孫子見而樂之。壽之梨棗。廣播  
海內。蓋欲使天下人人盡皆行善。斷除惡孽。具此願力。  
雖不謂之上士不可也。好善若此。吾知福孫子者。必先  
推其所本。將見其雙親由耄耋而期頤。獲福豈有量乎。  
若夫後嗣之克昌。門閭之光顯。更不卜可知矣。雖然。上  
古之士。惟恐好名。中晚以降。惟恐不好名。孫子好道之  
心。如此其專。樂善之念。如此其勤。自今以後。吾竝願孫  
子化其好名之心。而不以今人自安也。勉之勉之。謹序。  
康熙二十五年歲次丙寅暮春楚中袁石公撰

石公名  
宏道

又  
陰騭文垂訓。行世已久。然世人不能仰體帝君勸世省身之意。未免視爲具文。珂主籍桂宮。躬事帝君。哲謀睿慮。常憫世人之多迷。人心之難潔。六十年華。茫茫易過。不能有所建立於世間。皆由身耽塵囂。終無一事合於聖賢神仙之道。甚爲惜之。今秦中曾公。前朝柱石。忠孝名儒。欲大啟世人之迷。作陰騭文句頌。蓋欲傳之四海。垂之千載。以仰副帝君之至意。吾願世人。講習省悟。奉行不輟。卽此則意誠心正。身修而齊家治國。無不一以

貫之矣。予見曾公如此立言立功。廣施大道。故予弗自鄙。亦以一言敬題於後。康熙五年歲在丙午陽月粵西李文珂寄塵氏謹識

又

帝君開闢造物。以定人倫。以別善惡。凡世間士庶。富貴貧窮。苟能遇功而行。必敬必信。必忠必仁。遇過而省。勿淫勿殺。勿貪勿暴。時刻存之意念。則舉步皆善。何難卽脫癡迷之境。頓超墮落之門。此陰騭寶訓。與感應靈篇。同條共貫。垂百世而不刊也。但流傳旣久。從未有人爲

之闡發。開示。今西秦曾夫子。降乩於鳳嘯軒中。將帝君  
寶訓。詳著分明。義理融徹。使人捧誦之下。口解心維。暴  
戾之念頓消。菩提之心隨起。將來道法昌盛。民風淳樸。  
皆係乎是編。洵哉曾夫子校定之功不淺也。贅書數語  
於後。

又

鉉菰蘆下士。檢身多缺。澤物無能。豈敢以福緣之說。憬  
覺斯世。顧自總角時。芸牕晨課。卽誦帝君陰騭文。歷  
久不輟。雖未能實實體行。然固性所嗜慕也。行歲設乩

請仙於鳳嘯軒中。荷有西安曾公降。得示陰騭文句頌。  
竊謂其箴規切近。善體帝君警世之心。由是佩服有年。  
未經行世。丙寅春。仲兒德溥發痘。徧體若鋪。醫者皆云  
難治。一時斡旋無術。惟對天禱祝。願以陰騭文句頌刊  
播。越兩宿而漿濃痂厚。悉更前狀。醫者咸叱爲神異。兩  
年以來。又以塵網紛紛。欲行輒止。去冬顏子生愉。以丹  
桂籍見示。披閱之餘。愧慕交集。因念句頌。久珍什襲。勿  
克與茲籍公之同善。尙安待乎。節費付梓。以附卷末。覽  
者庶諒。鉉之鄙志云。雲間孫鉉思九氏謹識。



